

顏魯公集

冊二



顏魯公文集卷四

長沙黃本驥仲良編訂

湘陰蔣環維揚參校

判

對三命判

乙仕登三命舉以特牲祀以少牢人告其僭加於舉禮也

侑食以樂執恭展禮以辨等威以明貴賤乙以筮仕策名清朝從大夫之後既登三命循先人之祭有事十倫已而鏗鏘具舉和平不爽苾芬承祀胡考之寧舉特且叶於禮經加牢未虧於祀典人告其僭罔知攸伏

案開元二十二年公以是判擢拔萃科其同擢者有馬銑一判載入全唐文
案楊志堅妻求別適判

楊志堅素爲儒家偏覽九經篇詠之間風騷可撫愚妻覩其未遇遂有離心王歡之廩既虛豈遵黃卷朱叟之妻必去寧見錦衣污辱鄉閭敗傷風俗若無褻

貶僥倖者多阿王決二十後任改嫁楊志堅秀才贈布絹各二十匹米二十石
便署隨軍仍令遠近知悉

顏魯公為臨川內史澆風莫競文教大行康樂以來用為佳譽也邑有楊志
堅者嗜學而居貧鄉人未之知也山妻厭其饘藿不足索書求離志堅以詩
送之曰平生志業在琴書頭上於今有二絲漁父尚知溪谷暗山妻不信出
身遲荆釵任意撩新鬢鸞鏡從他別畫眉今日便同行路客相逢即是下山
時其妻持詩詣州請公牒以求別適魯公案其妻曰云云江左數十年來莫
有敢棄其夫者

范據雲
溪友議

牒

訪求清河行人李華牒

據殷亮撰
行狀增

清河郡屬崔審交應賊之後吏不安行人李華乃崇墉浚隍鍛甲矯翦乞師破
敵和眾以安之靜言其功須有甄賞

案李華即李崕前在清河乞師於公及堂邑戰勝見公讓功於賀蘭進明崕

遂藏於民間至德改元公以軍用已竭思所以贍濟之遂牒於路以求嶧嶧至爲畫收鹽置場之策軍用遂贍

書

與郭僕射書

廣德二年十一月

十一月日金紫光祿大夫檢校刑部尚書上柱國魯郡開國公顏真卿謹奉書於右僕射定襄郡王郭公閣下蓋太上有立德其次有立功是之謂不朽抑又聞之端揆者百寮之師長諸侯王者人臣之極地今僕射挺不朽之功業當人臣之極地豈不以才爲世出功冠一時挫思明跋扈之師抗回紇無厭之請故得身晝凌烟之閣名藏太室之廷吁足畏也然美則美矣而終之始難始當作實故曰滿而不溢所以長守富也高而不危所以長守貴也可不儆懼乎書曰爾惟弗矜天下莫與汝爭功爾惟不伐天下莫與汝爭能以齊桓公之盛業片言勤王則九合諸侯一匡天下葵邱之會微有振矜而叛者九國故曰行百里者半九十里言晚節末路之難也從古至今哀我高祖太宗已來未有行此而不理

廢此而不亂者也前者菩提寺行香僕射指麾宰相與兩省臺省已下常參官並爲一行坐魚開府及僕射率諸軍將爲一行坐若一時從權亦猶未可何況積習更行之乎一昨以郭令公以父子之軍破犬羊凶逆之衆衆情忻喜恨不頂而戴之是用有興道之會僕射又不悟前失竟率意而指麾不顧班秩之高下不論文武之左右苟以取悅軍容爲心曾不顧百寮之側目亦何異清晝攫金之士哉甚非謂也君子愛人以禮不聞姑息僕射得不深念之乎真卿竊聞軍容之爲人清修梵行深入佛海況乎收東京有殄賊之業守陝城有戴天之功朝野之人所共貴仰豈獨有分於僕射哉加以利衰塗割恬然於心固不以一毀加怒一敬加喜尙何半席之座咫尺之地能汨其志哉且鄉里上齒宗廟上爵朝廷上位皆有等威以明長幼故得彝倫敘而天下和平也且上自宰相御史大夫兩省五品已上供奉官自爲一行十二衛大將軍次之三師三公令僕少師保傅尙書左右丞侍郎自爲一行九卿三監對之從古以然未嘗參錯至如節度軍將各有本班卿監有卿監之班將軍有將軍之位縱是開府特進

並是勳官用蔭卽有高卑會讌合依倫敘豈可裂冠毀冕反易彝倫貴者爲卑
所凌尊者爲賤所偏

石本賤
誤作賊

一至於此振古未聞如魚軍容階雖開府官卽監

門將軍朝廷列位自有次序但以功績旣高恩澤莫二出入王命衆人不敢爲
比不可令居本位須別示有尊崇只可於宰相師保座南橫安一位如御史臺

衆尊知雜事御史別置一榻使百寮共得瞻仰

石本誤
重使字

不亦可乎聖皇時開府

高力士承恩傳宣亦只如此橫座亦不聞別有禮數亦何必令他失位如李輔
國倚承恩澤徑居左右僕射及三公之上令天下疑怪乎古人云益者三友損

者三友願僕射與軍容爲直諒之友不願僕射爲軍容佞柔之友又一昨裴僕

射誤欲令左右丞勾當尙書當時輒有誚對僕射特貴張目見尤介衆之中不

欲顯過今者興道之會還爾遂非再謁八座尙書欲令便向下座州縣軍城之

禮亦恐未然朝廷公讌之宜不應若此今旣若此僕射意只應以爲尙書之與

僕射若州佐之與縣令乎若以尙書同於縣令則僕射見尙書令得如上佐事

刺史乎益不然矣今旣三廳齊列足明不同刺史且尙書令與僕射同是二品

只校上下之階六曹尙書並正三品又非隔品致敬之類尙書之事僕射禮數未敢有失僕射之顧尙書何乃欲同卑吏又據宋書百官志八座同是第三品隋及國家始升別作二品高自標致誠則尊崇向下擠排無乃傷甚況在於公堂揭咄常伯當爲令公初到不欲紛披僂俛就命亦非理屈朝廷紀綱須共存立過爾隳壞亦恐及身明天子忽震電含怒責戮彝倫之人則僕射其將何辭以對

帖

與李太保帖九首

辭後明日至宅奉送承已當時出闕不獲重捧袂至今爲恨仲春漸暄不審太保尊體何如真卿粗爾不審初到如何佇承異績以慰瞻仰因中郎張澈往謹附狀不宣謹狀二月十四日刑部尙書顏真卿狀上李太保大夫公閣下張澈昨艱難時首末得力願在麾下有容足處庇之幸甚謹空

奏事官至蒙問增慰馳誠冬閏初寒伏惟太保尊體安適真卿悲疚何言蕃寇

推退爲憲之功忝沐深情俱增喜躍前後不逢之信遂闕修狀何時入奏未聞
悲係無喻謹還狀不次謹狀閏月十有四日刑部尙書顏真卿狀上李太保大
夫公閣下謹空

真卿粗自奉別渴仰何勝昨緣馬奔遂失馳謁想蒙情恕也真卿十五日離家
大小俱安沈沈病瘡少愈勿憂爲佳正遠披承益期自愛謹勒參候不次刑部
尙書顏真卿頓首李太保大夫公閣下

千手贊已領訖然尙少第二隔恐在書府希更根尋足疎拙抵罪聖慈含宏猶
佐列藩不遠伊邇省躬荷德恩貸實深兢慄之誠在物何喻仲春暄甚不審太
保尊體何如所苦當轉勝也真卿緣驛上無馬私乘泡轉幾死前進不得今日
始至藍田卽便取路不獲執別此情如何珍重珍重謹附狀不次謹狀二月十
一日硤州別駕顏真卿狀上李太保大夫公閣下

不審所苦何如奉計已痊復真卿緣馬病朝迴已乏未遂馳謁謹勒參候不次
謹狀刑部尙書顏真卿狀上李太保大夫公閣下

千手贊檢得未帖之謹空

拙於生事舉家食粥來已數月今又罄竭祇益憂煎輒恃深情故令投告惠及少米實濟艱勤仍恕干煩也真卿狀

陰寒不審太保所苦何如承渴已損深慰馳仰所檢贊猶未獲望於文書內細檢也病妻服藥要少鹿肉脯有新好者望惠少許幸甚幸甚專馳謁不次謹狀二十九日刑部尚書顏真卿狀上李太保大夫公閣下謹空

惠及鹿脯甚慰所望春寒承美闕一字一痊損更加保愛真卿有一二藥煩宜常服

謹令馳納少間借馬奉謁不次二十日顏真卿狀上太保大夫公閣下

與御史帖

真卿謹別上書於御史閣下竊聞尊候平和真卿瞻仰瞻仰前所會廟上諸公未悟唯御史論高百寮振古未有雜事可置況朝廷自有次序不足念乎真卿

與盧倉曹帖三首

昨奉辭但增悵仰承已過壞不得重別情深惘然珍重謹此不宣真卿白二十

四日

盧八倉曹足下敘本甚是佳製耳

據留元剛忠義堂帖增

足下今日定成行否不得一至郊郭深用悵然珍重珍重所欲拙書今勒送十

餘紙望領之忽怪弱惡也不具不具真卿

盧倉曹足下

據鞏嶸忠義堂續刻增

與蔡明遠帖二首

蔡明遠鄱陽人真卿昔刺饒州即嘗趨事及來江右無改厥勤靖言此心有足
嘉者一昨緣受替歸北中止金陵闔門百口幾至餬口明遠與夏鎮不遠數千
里冒涉江湖連舸而來不愆晷刻竟達命於秦淮之上又隨我於邗溝之東追
攀不疲以至邵伯南埭始終之際良有可稱今既已事方旋指期斯復江路悠
緬風濤浩然行李之間深宜尚慎不宣真卿報

聞鄒游與明遠同來欲至采石計其不久亦合及吾淮泗之間脫若未到見之
宜傳此意遣此不宣真卿報蔡明遠

劉中使帖

近聞劉中使至瀛州吳希光已降足慰海隅之心耳又聞磁州爲盧子期所圍舍利將軍擒獲之吁足慰也

與夫人帖

真卿頓首奉承十四日遷厝承問悲慕不能自勝惟攀慕不及摧毀何堪痛當奈何痛當奈何凝寒惟動靜支適兒子等保持真卿離官已久事須十間前至鄭州汴州已來專奉待一日只擬一驛計過大事後發猶恐遲必望知此緩急勿遲滯足下不來義無獨去之法必請矜此狼狽所望今到汴州水下不愁河凍書祭器等先下船去真卿十一日且發東京佇望早來早來謹不次真卿頓首夫人閣下 十一月八日 問訊頌翹蒙郎和奴光嚴深遠憶或至十三日得發

案帖後所問之訊杲卿之孫後爲兵曹參軍見公撰伯父元孫碑頌公親姪後爲清源尉封費縣男見公撰大宗家廟及曾祖勤禮三碑翹杲卿之姪後爲華原主簿見公撰大宗家廟勤禮元孫四碑

與緒汝書

政可守不可不守吾去歲中言事得罪又不能逆道徇時爲千古罪人也雖貶居遠方終身不恥緒汝等當須會吾之志不可不守也

與澄師帖

真卿承聞大華嚴會已遂園成取來日要詣彼隨喜如何如何幸周副老草不悉真卿頓首和南澄師大德侍者十日敬空

廣平帖

得示閱廣平碑本了來數日故當封呈真卿頓首

文殊帖

近作一文殊師利菩薩碑但欲發揚主上聖意蓋不近文律耳今奉呈充蓋贊之用可乎真卿白

案此帖公在湖州作

寒食帖

天氣殊未佳汝定成行否寒食只數日間得且住爲佳耳

中夏帖

真卿頓首中夏以還暑氣日甚病懶益不喜所爲前欲書石當須稍涼作之也幸不以差緩過之京人來何消息嘉否

修書帖

賊軍未平使僕不憤見故先修書但召諸子弟與語不具真卿

訊後帖

真卿具前楮訊後所苦何如立斯極位雄廷江上佳山秀水在公庭戶想日有樂事甚得佳士相延公高才逸韻自有晉宋間人風坐此肆局不易處上方招致仁者如公之儔豈久在江左乎行聞迅召以快士議真卿頓首

一行帖

據王案汝帖增

真卿一行昨自江淮日趨百里本期奉見以慰遠別疲於道路且止數昔但深攀仰耳

南來帖

據鞏忠義堂續刻增

真卿承命南來諸事草草但賊勢尙爾奈何張貞□不了國事可念可念真卿

江外帖

據忠義堂續刻增

江外唯湖州最卑下今年諸州水並湊此州入太湖田苗非常沒溺賴劉尙書與拯以此人心差安不然僅不可安耳真卿白

案此帖公在湖州作

草篆帖

據忠義堂續刻增

真卿自南朝來上祖多以草隸篆籀爲當代所稱及至小子斯道大喪但曾見張旭長史頗示少糟粕自恨無分遂不能佳耳真卿白

奉使蔡州書

真卿奉命來此事期未竟止緣忠勤無有旋意然中心悵悵始終不改游於波濤宜得斯報千百年間察真卿心者見此一事知我是行亦足達於時命耳

移蔡帖

貞元元年正月五日真卿自汝移蔡天也天之昭明其可誣乎有唐之德則不
朽耳十九日書

...

...

顏魯公文集卷四

...

...

...

...

...

...

...

...

顏魯公文集卷五

寧鄉黃本驥仲良編訂

湘陰蔣 瓌維揚參校

序

尚書刑部侍郎贈尚書右僕射孫逖文公集序

永泰元年八月

古之爲文者所以導達心志發揮性靈本乎詠歌終乎雅頌帝庸作而君臣動色王澤竭而風化不行政之興衰實繫於此然而文勝質則繡其鞶帨而血流漂杵質勝文則野於禮樂而木訥不華歷代相因莫能適中故詩人之賦麗以則詞人之賦麗以淫此其效也漢魏已還雅道微缺梁陳斯降宮體聿興旣馳騁於末流遂受嗤於後學是以沈隱侯之論謝康樂也乃云靈均已來此未及覩盧黃門之序陳拾遺也而云道喪五百歲而得陳君若激昂頽波雖無害於過正權其中論不亦傷於厚誣何則雅鄭在人理亂由俗桑間濮上胡爲乎繇古之時正始皇風奚獨乎凡今之代蓋不然矣其或斌斌彪炳郁郁相宣膺期

運以挺生奄寰瀛而首出者其惟僕射孫公乎公諱遜河南鞏人其先自樂安
武水寓於涉而徙焉父嘉之以詞學登科官至宋州司馬公風裁徵明天才傑
出學窮百氏不好非聖之書文統三變特深稽古之道故逸氣上躋而高情四
達羌索隱乎混元之始表獨立於常均之外不其盛歟年數歲卽好屬文十五
時相國齊公崔日用試土火鑪賦公雅思適麗援翰立成齊公駭之約以忘年
之契爾後遂有大名故其試言也年未弱冠而三擅甲科吏部侍郎王邱試竹
簾賦降階約拜以殊禮待之相國燕公張說覽其策而心醉其序事也則伯樂
川記及諸碑志皆卓立千古傳於域中其爲詩也必有逸韻佳對冠絕當時布
在人口其詞言也則宰相張九齡欲掎摭疵瑕沈吟久之不能易一字公之除
庶子也苑咸草詔曰西掖掌綸朝推無對議者以爲知言凡斯夥多庸可悉數
故燕國深賞公才俾與張九齡許景先韋述同遊門庭命子均埶申伯仲之禮
江夏李邕自陳州入計繕寫其集齋以詣公託知己之分其爲先達所重也如
此公又雅有清鑒典考功時精覈進士雖權要不能逼所擬擢者二十七人數

年間宏詞判等入甲第者一十六人授校書郎者九人其餘咸著名當世已而多至顯官明年典舉亦如之故言第者必稱孫公而已夫然信可謂人文之宗師國風之哲匠者矣凡公所著詩歌賦序策問贊碑志表疏制誥不可勝紀遭二朝之亂多有散落子宿絳成等夙奉過庭之訓咸以文章知名同時臺省乃編次公文集爲二十卷列之於左庶乎好事者傳寫諷誦以垂乎無窮亦何必藏名山而納石室也真卿昔觀光乎天府實荷公之獎擢見命爲序豈究端倪時則永泰元年仲秋之月也至若世系闕閱蓋存之別傳此不復云

懷素上人草書歌序

開士懷素僧中之英氣概通疏性靈豁暢精心草聖積有歲時江嶺之間其名大著故吏部尚書韋公陟覩其筆力勛以有成今禮部侍郎張公謂賞其不羈引共遊處兼好事者同作歌以贊之動盈卷軸夫草藁之作起於漢代杜度崔瑗始以妙聞迨乎伯英尤擅其美羲獻茲降虞陸相承口訣手授以至於吳郡張旭長史雖姿性顛逸超絕古今而楷法精詳特爲真正某早歲嘗接游居屢

蒙激勸告以筆法資質劣弱又嬰物務不能懇習迄用無成追思一言何可復得忽見師作縱橫不羣迅疾駭人若還舊觀向使師得親承善誘亟揖規模則入室之賓舍子奚適嗟嘆不足聊書以冠諸篇首

顏刑部書家者流水鏡之辨許在末行

懷素自敘帖

世系譜序

建中元年七月

顏氏之先出自黃帝之孫安為曹姓其裔邾武公名儀父字伯顏子友別封邾為小邾子遂以顏為氏世為魯國卿大夫孔門達者七十二人顏氏有八回居四科之首其後戰國有率躅秦有芝貞漢有異肆安樂魏有裴盛盛字叔臺歷青徐二州刺史關內侯其後子孫咸著宦族有若宏都之德行巴陵記室之書翰特進黃門之文章祕監華州之學識肇自魯國格於聖代紛綸盛美舉集於茲述遵前人不敢失墜建中元年歲次庚申秋七月癸亥序

案唐書宋史藝文志皆有顏氏家譜一卷未著撰人名氏以是序證之家譜

亦魯公自撰也

送福建觀察使高寬仁序

國家設觀察使卽古州牧部使之職代朝廷班導風化而宣布德意振舉萬事而沙汰百吏者也民俗之舒慘兵賦之調發刑獄之寃濫政治之得失皆得以觀察而行之其任可謂重矣江西貴溪高君寬仁初舉明經歷任中外克勤職務政績昭著陞福建觀察使夫君子之仕不以位尊爲榮而以盡職爲貴福建大藩也其地東帶滄溟南接交廣居民若是其衆也政務若是其煩也職乎州郡者果皆循且良尙不能保其無一事之不舉矧未必皆循良乎弱之食強之取飢寒顛沛而漁奪之不厭則吠畝之民若之何能求其安也自古爲民之病者多類此是以居高位而欲下之安其道難也故衆皆以位高爲寬仁喜予獨以盡職爲寬仁勉所以盡職者無他正己格物而已忠君愛民而已予與寬仁交久且厚予所以望於寬仁者豈但在於政事文字之間而已哉振肅風紀表儀一方盡致君澤民之道使聲名流芳史冊茲行是望於是乎書

案唐書方鎮表大曆六年廢福建節度使置都團練觀察處置使序當作於

六年設使之後高寬仁科貫無攷舊集不載此序全唐文未知從何書採入

送劉太冲序

劉太冲者彭城之華望者也自開府垂明於宋室澤州考績於國朝道素相承世傳儒雅尙矣夫其果行修潔斯文彪蔚鄂不照乎核華龍驥驤乎雲路則公山正禮策高足於前冲與太真嗣家聲於後有日矣昔余作郡平原拒胡羯而請與從事掌銓吏部第甲乙而超升等夷爾來蹉跎猶屑卑位雖才不偶命而德其無鄰故冲之西遊斯有望矣江月弦魄秦淮頂潮君行句溪正及春水勛哉之子道存何居魯郡公顏真卿敘

送辛子序

醇白之士曰隴西辛冕銳業班漢顓門名家十五而志學克明五十而勵精益懋拳拳不失慕回也之服膺袞袞可聽同茂先之善說昔我高叔祖鄆州使君著決疑一十二卷問答稱爲大顏曾伯祖祕書監府君集註解成一十二帙名儒斟酌煩省摭撫英華勒成三十篇名之曰漢略夫其發凡舉例冕序言之已

詳惜乎困於縑緇不獲繕寫遂使精義沈鬱闡然未彰吁足歎也二月初吉金陵氣暖抵淮上之諸侯所如必合及滁川之美景未至方歡羣子賦詩以寵之案鄆州使君顏游秦也祕書監府君顏師古也唐書藝文志有顏游秦漢書決疑十二卷

記

張長史十二意筆法記

天寶五載

予罷秩醴泉特詣京洛訪金吾長史張公旭請師筆法長史於時在裴儼宅憩止已一年矣衆師張公求筆法或有得者皆曰神妙僕頃在長安二年師事張公皆大笑而已卽對以草書或三紙五紙皆乘興而散不復有得其言者僕自再於洛下相見眷然不替僕因問裴儼足下師張長史有何所得曰但書得絹屏素數十軸亦嘗論諸筆法唯言倍加工學臨寫書法當自悟耳僕自停裴家月餘日因與裴儼從長史言話散卻迴京師前請曰旣承兄丈一本作九丈獎諭日月滋深夙夜工勤溺於翰墨儼得聞筆法要訣終爲師學以冀至於能妙豈任

感戴之誠也長史良久不言乃左右眄視拂然而起僕乃從行歸東竹林院小堂張公乃當堂踞牀而坐命僕居於小榻而曰筆法元微難妄傳授非志士高人詎可與言要妙也書之求能且攻真草今以授之可須思妙乃曰夫平謂橫子知之乎僕思以對之曰嘗聞長史示令每爲一平畫皆須令縱橫有象此豈非其謂乎長史乃笑曰然而又問曰直謂縱子知之乎曰豈不謂直者從不令邪曲之謂乎曰均謂間子知之乎曰嘗蒙示以間不容光之謂乎曰密謂際子知之乎曰豈不謂築鋒下筆皆令宛成不令其疎之謂乎曰鋒謂末子知之乎曰豈不謂以末成畫使其鋒健之謂乎

一本健作健

曰力謂骨體子知之乎曰豈不

謂趨筆則點畫皆有筋骨字體自然雄媚之謂乎曰轉輕謂屈折子知之乎曰豈不謂鉤筆轉角折鋒輕過亦謂轉角爲闔闊過之謂乎曰決謂牽掣子知之乎曰豈不謂牽掣爲擊銳意挫鋒使不怯滯令險峻而成以謂之決乎曰補謂不足子知之乎曰豈不謂結點畫或有失趣者則以別點畫旁救之謂乎曰損謂有餘子知之乎曰豈不謂趣長筆短常使意勢有餘點畫若不足之謂乎曰

巧謂布置子知之乎曰豈不謂欲書先預想字形布置令其平穩或意外字體令其異勢是謂之巧乎曰稱謂大小子知之乎曰豈不謂大字蹙之令小小字展之爲大兼令茂密所以爲稱乎長史曰子言頗皆近之矣夫書道之妙煥乎其有旨焉字外之奇言所不能盡世之書者宗二王元常逸跡曾不睥睨筆法之妙遂爾雷同獻之謂之古肥旭謂之今瘦古今既殊肥瘦頗反如自省覽有異衆說芝鍾巧趣精細殆同始自機神肥瘦古今豈易致意真跡雖少可得而推逸少至於學鍾勢巧形容及其獨運意疏字緩譬猶楚音習夏不能無楚過言不悒未爲篤論又子敬之不逮逸少猶逸少之不逮元常學子敬者畫虎也學元常者畫龍也予雖不習久得其道不問之言必慕之歟儻有巧思思盈半矣子其勉之工精勤悉自當妙矣真卿前請曰幸蒙長史傳授筆法敢問工書之妙如何得齊於古人張公曰妙在執筆令其圓轉勿使拘攣其次諸法須口傳手授之訣勿使無度所謂筆法也其次在於布置不慢不越巧使合宜其次紙筆精佳其次諸變適懷縱捨規矩五者備矣然後齊於古人矣敢問執筆之

理可得聞乎長史曰予傳授筆法之老舅彥遠曰吾聞昔日說書若學有工而跡不至後聞於褚河南曰用筆當須如印泥畫沙思所以不悟後於江島遇見沙地平淨令人意悅欲書乃偶以利鋒畫其勁儉之狀明利媚好乃悟用筆如錐畫沙使其藏鋒畫乃沈著其用鋒常欲使其透過紙背此成巧之極矣真草用筆悉如畫沙則其道至矣是乃其迹可久自然齊古人矣但思此理以專想工用故其點畫不得妄動子其書紳予遂銘謝再拜逡巡而退自此得攻書之術於茲五年真草自知可成矣

案宋史藝文志有顏真卿筆法一卷卽此記也

汎愛寺重修記

予不信佛法而好居佛寺喜與學佛者語人視之若酷信佛法者然而實不然也予未仕時讀書講學恆在福山邑之寺有類福山者無有無予蹟也始僦居則凡海印萬福天寧諸寺無有無予蹟者既仕於崑時授徒於東寺待客於西寺每至姑蘇恆止竹堂目予實信其法故爲張侈其事以惑沙氓則非知予者

矣

案崑卽今蘇州府崑山縣在唐爲蘇州吳郡屬縣記云旣仕於崑又云每至姑蘇恆止竹堂攷公宦蹟未嘗仕於崑山惟十有三歲時侍母殷隨外祖子敬任曾至吳郡其時年幼不應栖止竹堂僧寺其後大歷六年三月罷撫州刺史事八月移寓江寧曾繞道吳郡亦不得云每至姑蘇此記疑非魯公所
作全唐文不知據何本採入存之而附辨如此

東方先生畫贊碑陰記

天寶十三
載十二月

東方先生畫贊者晉散騎常侍夏侯湛之所作也湛字孝若父莊爲樂陵太守因來覲省遂作斯文贊云大夫諱朔字曼倩平原厭次人魏建安中分厭次爲樂陵郡又爲郡人焉厭次今移屬樂安郡東去祠廟六百里故厭次城今在平原郡安德縣東北二十二里廟西南一里先生形像今則捏素爲之並二細君侍焉郡嘗爲德州其贊開元八年刺史韓公思復刻於石碑真卿去歲拜此郡屬殿中侍御史平公冽監察御史閻公寬李公史魚右金吾曹宋公審咸以

河北採訪使東平王判官巡按狎至真卿候於境上而先生祠廟不遠道周亟與數公臬家兄淄川司馬曜卿長史前洛陽令蕭晉用前醴泉尉李伯魚徵君左驍衛兵曹張璲麟遊尉章宅相朝城主簿韋有夏司經正字畢耀族弟渾前參軍鄭悟初同茲謁拜退而遊於中唐則韓之刻石存焉僉歎其文字纖靡駁薛生金四十年間已不可識真卿於是勒諸他山之石蓋取其字大可久不復課其工拙故援翰而不辭焉至若先生事跡則載在太史公書漢書風俗通武帝內傳十洲記列仙神仙高士傳此不復紀焉有唐天寶十三載季冬辛卯朔建

案杜少陵集有寄韋有夏郎中五言六韻詩碑內朝城主簿卽其人也

鮮于氏離堆記

寶應元年四月

閬州之東百餘里有縣曰新政新政之南數千步有山曰離堆斗入嘉陵江直上數百尺形勝縮矗欹壁峻蕭上崢嶸而下迴泮不與衆山相連屬是之謂離堆東面有石堂焉卽故京北尹鮮于君之所開鑿也堂有室廣輪袤丈蕭豁洞

敞虛聞江聲徹見羣象人村川垣若指諸掌堂北磐石之上有九曲流杯池焉
懸源螭首蹙噴鶴味醜渠股引冽坐環溜若有良朋以傾醇酎堂南有茅齋焉
遊於斯息於斯聚賓友於斯虛而來者實而歸其齋壁間有詩焉皆君舅著作
郎嚴從君甥殿中侍御史嚴銑之等美君考槃之所作也其右有小石廬焉亦
可蔭而跋據矣其松竹桂椿冬青雜樹皆徙他山而栽蒔焉其上方有男宮觀
焉署之曰景福君弟京兆尹叔明至德二年十月嘗任尚書司勳員外郎之所
奉置也君諱向字仲通以字行漁陽人卓爾堅忮毅然抗直易有之曰篤實輝
光書不云乎沈潛剛克君自高曾以降世以財雄招徠賢豪施舍不倦至君繼
緒其流益光弱冠以任俠自喜尙未知名乃慷慨發憤於焉卜築養蒙學文忘
寢與食不四三載展也大成著作奇之勛以賓薦無何以進士高第驟登臺省
天寶九載以益州大都督府長史兼御史中丞持節充劍南節度副大使知節
度使事劍南山南西道採訪處置使入爲司農少卿遂作京兆尹以忤楊國忠
貶邵陽郡司馬十有二載秋八月除漢陽郡太守冬十有一月終於所任官舍

悲夫雄圖未伸志業已空葬於縣北表祔先塋禮也君之薨也冢子光祿寺丞
昱匍匐迎喪星言泣血自沔泝峽湍險萬重肩槁足踣扳笻引舳凡經幾年數
塚在目因心則至豈無僮僕曩昱之季曰尙書都官員外郎昃克篤前烈永言
孝思懇闕二志反葬於茲行道之人孰不跋而真卿猶子曰紘從父兄故偃師
丞春卿之子也嘗尉閬中君故舊不遺與之有忘年之契叔明昱昃亦篤世親
之歡真卿因之又忝憲司之寮亟與濟南蹇昂奉以周旋益著通家之好兄允
南以司膳司封二郎中第允臧以三院御史皆與叔明首末聯事我是用鮑君
之故乾元改號上元之歲秋八月哉生魄猥自刑部侍郎以言事忤旨聖恩全
宥貶貳於蓬州沿嘉陵而路出新政適會昱以成都兵曹取急歸覲遭我乎貴
州之朝留游締歡信宿徑峴感今懷昔遂援翰而志之叔明時刺商州昃又申
掾京兆不同躋陟有恨如何帝唐龍集後壬寅仲夏己卯朔十五日甲午刻於
門序之左右

撫州城東南四里有翻經臺宋康樂侯謝公元嘉年初於此翻譯涅槃經因以爲號公諱靈運陳郡陽夏人也祖元晉車騎將軍父瑒祕書郎公幼穎悟好學博覽羣書文章之美江左莫逮以襲祖爵世人宗之盛稱謝康樂初爲劉毅衛軍從事中郎太子左率出爲永嘉太守郡有各山水公素愛好肆意遨遊稱疾去職於始寧縣修營故墅傍山帶江盡幽居之美因著山居賦並自註之與隱士王宏之等遊放爲娛有終焉之志每一詩至都邑莫不競寫宿昔之間士庶皆徧徵爲祕書監再召不赴太祖使范泰與書敦獎之乃出就職尋遷侍中曰夕引見賞遇甚厚多疾不朝賜假東歸免官與從弟惠連東海何長瑜頴川荀道雍泰山羊璿之以文章賞會時人謂之四友尋山登賞常著木屐上則去其前齒下則去其後齒會稽太守孟顛事佛精懇公謂之曰得道應須慧業丈人生天應在靈運前成佛必在靈運後顛深恨此言後遂表公有異志公馳出自陳太祖知見誣除臨川內史公以曇無讖所翻大涅槃經語少朴質不甚流靡品數疎簡初學者難以措懷乃與沙門范惠嚴顧慧觀依舊泥洹經共爲潤色

勒成三十六卷義理昭暢質文相宣歷代寶之盛行於天下其餘感神徵應具如高僧傳所說邈乎階扃不改棟宇具無真卿叨刺是邦茲用愼息有高行頭陀僧智清緒發洪誓精心住持請以佛跡寺僧什喻仙臺觀道士譚仙巖同力增修指期恢復自見法堂之遺構克崇先達之高蹤不泯百里而遙四山不逼三休而上十地方超經行之業既崇斗數之功斯懋大曆己酉歲四月丙午都人士庶相與大會設嚴供而落焉以真卿業於斯文見咨紀述後之君子其忘增修乎銘曰

摩訶般若解脫法身是則涅槃衆經中尊曇無鞞允嚴觀是因實賴同德宏茲法輪謝公發揮精義入神理絕史野文兼郁彬一垂刊削百代咸遵遺跡忽睹高臺嶙峋載悲徂謝曷踐音塵真卿愀然憫故孰新檀那衣鉢悉力經綸不日復之周邦仰仁緬懷敦慕予亦何人徒願神交媿非德鄰刻銘金石永永不泯

撫州寶應寺律藏院戒壇記

大曆六年三月

如來以身口意三業難調伏也淨尸羅以息其內行住坐臥四威儀攝善心也

明布薩以昭其外故曰波羅提木义是汝之師則憍陳如之善來迦葉波之尚
法諸聲聞三歸約衆十四年以八敬度尼羯磨相承其致一也至漢靈帝建寧
元年有北天竺五桑門支法領等始於長安譯出四分戒本兼羯磨與大僧受
戒至曹魏有天竺十尼自遠而來爲尼受具後秦姚萇宏始十一年有梵僧佛
陀耶舍譯出四分律本而關內先行僧祇江南盛行十誦至元魏法聰律師始
闡四分之宗聰傳道覆覆傳惠光傳雲暉願願傳理隱樂洪雲雲傳遵遵傳
智首首傳道宣宣傳洪洪傳法勵勵傳滿意意傳法成成傳大亮道賓亮傳雲
一賓傳岸超慧澄澄傳慧欽皆口相授受臻於壺奧欽俗姓徐洪州建昌人蓋
漢孺子之後也二十二尋師於臨川楮山後五歲削髮隸於高安龍岡寺遂受
戒有唐義淨則譯經上足曰洪州靈傑其秉宣羯磨者曰兩京清滌使法慧欽
智度冲深神用高爽行無懼實身絕開遮闡律藏而日月光明騁辯才而龍象
蹴踏江嶺之外凜然風生開元末北遊京師充東京福先大德常誦大涅槃經
而講之兼明俱舍論維摩金剛經每登講座其下日有二三千人由是名動輦

穀屬祿山作亂杖錫南歸居於西山洪井雙嶺之閒慕高僧觀顯之遺蹤於寺
北坳置蘭若山泉之美頗極幽絕欽雖堅持律儀而志在宏濟好讀周易左傳
下筆成章著律儀輔演十卷嘗撰本州龍興寺戒壇碑頗見稱於作者大曆三
年真卿忝刺撫州東南四里有宋侍中臨川內史謝靈運翻大涅槃經古臺階
局儼然軒構摧圮有高行頭陀僧智清者首事修葺安居住持明年秋七月真
卿績秩將滿有觀察使尙書御史大夫趙國魏公願以我皇帝降誕之辰奏爲
寶應寺仍請山林高行僧三七人冬十月二十三日聖恩允許於是鼎新輪奐
其興也勃焉乃請止觀大師法源法泉襄陽乘覺清源善宏羅浮圓覺佛跡十
喻餘杭慧達臬當州海通海岸等同住董修以資景福僉以爲學徒雖增毗尼
未立明年三月乃請欽登壇而董振鐸焉仍俾龍岡道幹天台法裔招提智融
白馬法允衡岳正覺同德義盈香城藏選龍興藏志開元明徹等同秉法事於
是遠近駿奔道場側塞聖像放光而龍王不雨者四旬僧尼等三百五十七人
而文士正議大夫前衛尉少卿張延臬脫俗歸真其名曰瓌綱爲稱首焉又欽

比年以來爲受具者凡一萬餘人江嶺湖海之間幅員千餘里像法於變此皆
欽教道之力焉臨川在嶺隅未嘗宏律於是二衆三百餘人請法裔敷演而依
止之矣復有上都資聖寺高德曰還本律主偉茲能辨深嗟歎而贊美之請於
寺東南置普通無礙禪院院內立鎮海觀音道場請善宏居之以開悟心要雲
一上足曰智融精持本事如會尊衆乃命智光等於普通道場東置律藏院剏
立戒壇以佇欽公之來儀且施肇紀之不朽經營未幾壇殿鬱興庶乎渡海浮
囊分毫絕羅刹之請嚴身瓔珞照耀有摩尼之光則入佛位而披伽梨者各香
普薰神足無極其可勝紀而蕪絕乎有唐大曆辛亥歲春三月行撫州刺史魯
郡開國公顏真卿書而誌之

撫州南城縣麻姑山仙壇記

大曆六年四月

麻姑者葛稚川神仙傳云王遠字方平欲東之括蒼山過吳蔡經家教其尸解
於蛇蟬也經去十餘年忽還語家人言七月七日王君當來過到期日方平乘
羽車駕五龍合異色旌旗導從威儀赫奕如大將也既至坐須臾引見經父兄

因遣人與麻姑相聞亦莫知麻姑是何神也言王方平敬報久不行民間今來在此想麻姑能蹵來有頃信還但聞其語不見所使人曰麻姑再拜不見忽已五百餘年尊卑有序修敬無階思念久煩信承在彼登山顛倒而先被記當按行蓬萊今便蹵往如是便還還卽親觀願不卽去如此兩時間麻姑來來時不先聞人馬聲旣至從官當半於方平也麻姑至蔡經亦舉家見之是好女子年十八九許頂中作髻餘髮垂之至要其衣有文章而非錦綺光彩耀目不可名字皆世所無有也得見方平方平爲起立坐定各進行廚金盤玉杯無限美膳多是諸華而香氣達於內外擗麟脯行之麻姑自言接待以來見東海三爲桑田向間蓬萊水乃淺於往者會時略半也豈將復還爲陸陵乎方平笑曰聖人皆言海中行復揚塵也麻姑欲見蔡經母及婦經弟婦新產數十日麻姑望見之已知曰噫且止勿前卽求少許米便以擲之墮地卽成丹沙方平笑曰姑故年少吾了不喜復作此曹狡獪變化也麻姑手似鳥爪蔡經心中念言背蚌時得此爪以杷背乃佳也方平卽知經心中念言卽使人牽經鞭之曰麻姑者神

人汝何忽謂其爪可以杷背邪見鞭著經背亦不見有人持鞭者方平告經曰
吾鞭不可妄得也大曆三年真卿刺撫州按圖經南城縣有麻姑山頂有古壇
相傳云麻姑於此得道壇東南有池中有紅蓮近忽變碧今又白矣池北下壇
傍有杉松皆偃蓋時聞步虛鐘磬之音東南有瀑布淙下三百餘丈東北有
石崇觀高石中猶有螺蚌殼或以爲桑田所變西北有麻源謝靈運詩題入華
子岡是麻源第三谷恐其處也源口有神祈雨輒應開元中道士鄧紫陽於此
習道蒙召入大同殿修功德二十七年忽見虎駕龍車二人執節於庭中顧謂
其友竹務猷曰此迎我也可爲吾奏願欲歸葬本山仍請立廟於壇側元宗從
之天寶五載投龍於瀑布石池中有黃龍見元宗感焉乃命增修仙宇真儀侍
從雲鶴之類於戲自麻姑發迹於茲嶺南真遺壇於龜源華姑表異於井山今
女道士黎瓊仙年八十而容色益少曾妙行夢瓊仙而餐花絕粒紫陽姪男曰
德誠繼修香火弟子譚仙巖法錄尊嚴而史元洞左通元鄒鬱華皆清虛服道
非夫地氣殊異江山炳靈則曷由纂懿流光若斯之盛者矣真卿幸承餘烈敢

刻金石而志之時則六年夏四月也

有唐宋州官吏入關齋會報德記

大曆七年五月

夫德之所感淪骨髓而非深誠之所至去神明而何遠有唐大曆壬子歲宋州入關齋會者此都人士裒文武將吏朝散大夫使持節宋州諸軍事行宋州刺史兼侍御史本州團練守捉使賜紫金魚袋徐向等奉爲河南節度觀察使開府儀同三司太子太師左右僕射知省事兼御史大夫汴州刺史上柱國信都郡王田公頌疾良己之所建也公名神功冀州南宮人稟元和之粹靈膺期運以傑出含宏厚下正直率先起孝而德感生人竭忠而精貫白日和衆必資於寬簡安人務在於撫柔況乎武藝絕倫英謀沈秘所向而前無強敵日新而學有緝熙故能殿天子之邦鬱蒼生之望有日矣羯戎構逆公以平盧節將佐今右僕射李公忠臣收滄德攻相州拒杏園守陳留許叔冀降而陷焉思明懼忠臣圖己令公佐南德信隨劉從諫收江淮至宋州欲襲李銑公斬德信走從諫遂並其衆而報焉肅宗大悅拜公鴻臚卿再襲敬釭於鄆州加中丞討劉展於

潤州斬平之遷徐州刺史明年拜淄青節度使屬侯希逸自平盧至公以州讓之時宋州刺史李岑爲賊所圍副元帥李光弼請公討平之拜御史大夫加開府充兗鄆州節度破法子營又討敬釭釭歸順焉史朝義聞之奔下博投范陽自縊死廣德元年授戶部尙書封信都郡王上幸陝公首來扈從都知六軍兵馬每食宿公皆躬自省視上感焉方委以政事公涕泣固辭而止二年拜汴宋節度遷兵部大歷二年加右僕射封母清河張氏爲趙國夫人妻信安郡王禕女爲涼國夫人太夫人慈和勤儉睦於親黨公性純孝居常不離左右閱讀書史或時疾病公輒累月不茹葷家中禮懺不絕仍造崇夏宏聖二寺以祈福祐五年兼判左僕射知省事加太子太師公德厚量深勞謙重慎功旣高而心益下位彌大而體益恭故遠無不懷邇無不肅今夏四月忽嬰熱疾沈頓累旬積善降祥勿藥遄喜鷹犬之翫悉皆棄捨羣帥感焉無復弋獵四履之內咸懷歡欣睢陽之人踴躍尤甚乃咨於州將曰昔我公之陷賊也至敝邑而首誅德信李岑之見圍也破其黨而克保城池是卽我公再有大造於敝邑矣微我公之

救恤卽皆死於鋒鏑入於煎熬矣尙何能保完家室嬉戲鄉井者乎不資齋明何以報德徐公悅而從之來五月八日首以俸錢三十萬設八關大會飯千僧於開元伽藍將佐爭承唯恐居後已而州縣官吏長史苗藏實等設一千五百人爲一會鎮遏團練官健副使孫琳等設五百人爲一會耆壽百姓張列等設五千人爲一會法筵等供仄塞於郊垆贊頌香花喧填於晝夜其餘鄉村聚落來往舟車聞風而靡督自勤聳而怵先胥懋者又不可勝數矣非夫美政淳深德風汪濊則何以感人若此其至者乎某叨接好仁飽承餘烈覩茲盛美益覲求蒙若不垂諸將來則記事者奚述

吳興沈氏述祖德記

大曆八年十二月

南齊徵士吳興沈君名麟士郡人也蘊道德晦於邑之餘不溪家貧無資以織簾爲業故時人號爲織簾先生精於禮傳嘗自詁訓宗人吏部郎中淵中書郎約累薦徵爲著作郎高臥不起名重江表臨終遺教依皇甫元晏棺中貯孝經一卷穿墻三尺置棺平土不設機位四時地席元酒而奠子彝奉而行之吳郡

陸惠曉張融皆爲之誅徵士嘗製述祖德碑立於金鵝山之先塋年月淹遠風
雨蠹蝕朽字殘文翳而莫分乾元中爲盜火所焚碑首毀裂嶽然將墮過江二
十葉孫御史中丞震移牒郡國請其封葺或屬兵凶曠而莫修忽有仆樹生於
龜腹盤根抱趾聳幹夾碑疑如工造鬱若神化敬者復正危而再堅夫德無名
遇賢而鍾慶神無質假物以申應沈氏積德旣遠徵士植德旣深天將興舊族
乎吾知沈之復大也權檢校宗事十九葉孫前太廟齋郎怡拜泣松檟增修舊
塋感先碑之隕覆懼遺文之殘闕乃具他石傳而貳焉崇其本所以尊先也建
其新所以嗣德也以真卿江南婚姻之舊中外伯仲之穆謬忝拜刺見託斯文
刊諸碑陰以傳無朽因改其樹爲慶樹以旌其美焉沈氏之故事具於家牒今
闕而不紀時有唐大曆八年冬十二月

乞御書題額恩敕批答碑陰記

大曆九年七月

肅宗皇帝恩許旣有斯答御劄垂下而真卿以疎拙蒙譴粵若來八月旣望貶
授蓬州長史曩今上卽位寶應元年夏五月拜利州刺史屬羌賊圍城不得入

恩勅追赴上都爲今尙書前相國彭城公劉公晏所讓授尙書戶部侍郎二年春三月改吏部廣德元年秋八月拜江陵尹兼御史大夫充荆南節度觀察處置等使未行受代轉尙書右丞明年春正月檢校刑部尙書兼御史大夫充朔方行營汾晉等六州宣慰使以招諭太師中書令僕固懷恩不行遂知省事永泰二年春二月貶峽州別駕旬餘移貶吉州大曆三年夏五月蒙除撫州刺史六年閏三月代到秋八月至上元爾來十有六年困於疎愚累蒙竄謫其所置碑石迄今委諸巖麓之際未遑崇樹七年秋九月歸自東京起家蒙除湖州刺史來年春正月至任州東有茗詿兩溪溪左有放生池焉卽我寶應元聖文武皇帝所置也州西有白鶴山山多樂石於是採而斲之命吏幹磨家僮鐫刻之建於州之駱駝橋東蓋以抒臣下追遠之誠昭先帝生成之德額旣未立追思莫達客或請先帝所賜敕書批答中諸字以緝而勒之真卿從焉勒願斯畢瞻慕不足遂志諸碑陰庶乎乾象昭回與宇宙而終始天文煥發將日月而齊暉時則有唐大曆九年青龍甲寅之歲孟秋甲子之日也

湖州石柱記

烏程縣舊緊今望鄉四十里二百東去蘇州二百一十里南去杭州一百八十九里西北去揚州六百四十七里西去宣州三百一十七里北去東都二千八百七十五里北去上都三千七百七十六里

帝顓頊冢 吳大帝陵 吳景帝陵 鈕皇后陵 吳丹陽太守蕪湖侯太史

慈墓 吳大將軍朱治墓 吳蕩寇將軍程普墓 晉侍中羅含墓 晉黃

門侍郎潘尼墓 齊宣城太守邱靈鞠墓 梁中書侍郎邱遲墓 梁司空

康絢續墓 陳五兵尚書康宗墓

長城縣

大雷山 芳巖 震澤 若溪 吳王夫概廟 陳景帝陵 陳錢皇后陵

陳昭烈王陵 謝安墓 殷仲文墓 陳武帝故宅 陳文帝故宅 吳均

故宅 陳氏五主屏風 陳高祖竹帳 國朝高僧南山律主道宣

安吉縣

天目山 崑山 橫溪 梅溪 蛟龍池 翔鳳林 裴子野故宅 周宏讓

故宅 姚萇雉尾扇 施世瑛金鐘

山川

卞山 法華寺 金井 玉澗 乳竇 石膏 溫泉 項王走馬埒 項王

飲馬池 項王繫馬石

衡山 帝顓頊冢 春秋鳩茲城

峴山 顯亭 故別駕李適之石酒罇 五花亭

杼山 妙喜寺 黃浦橋 避宅城 何楷釣臺

昇山 吳均入東記 晉吳興太守王羲之烏亭

金蓋山 何氏書堂 張邵邱道祚禪幽寺

太湖 周迴四萬八千頃

霅溪

白蘋洲

湖洲石柱在宋初字已漫漶歐陽永叔謂其筆畫奇偉非顏魯公不能書於是宋次道集魯公詩文刊於金石者編成一十五卷則石柱記存焉孫莘老知湖州聚境內碑碣築墨妙亭貯之凡三十二通記其一也所記山川陵墓廟宅旁及屏風竹帳雉尾扇顧唐設五縣而記遺其二或當日有之次道編集時殘闕未可知爾

朱彝尊石柱記序

案石柱記本在湖州之杼山魯公修韻海時所刻又名吳興地記唐置五縣記遺其二當係兩柱分刻僅傳其一康熙辛巳秀水朱檢討彝尊爲補記二縣歸安鄭君元慶爲箋釋原記四卷補記一卷今以補目附錄於左

德清縣 市亭山 金鵝山 吳羌山 餘不溪 北流水 苧溪 餘不

亭侯廟 梁吏部尚書沈約墓 孝鵝冢

武康縣 防風山 武康山 七里嶠 前溪 阮公溪 郭先生祠堂

沈道虔石山精舍 吳太常卿姚信墓 晉吏部尚書沈嘉墓 晉揚威將

軍東陽太守沈勁墓 宋吏部尚書沈演之墓

頃借書驅舫得宋槧石柱記載山川陵墓亡者三之一其存而不可信者亦三之一竹垞先生惜其殘闕為補記二縣余乃一一箋釋證其所可信復辨

其所不可信

鄭元慶箋註石柱記自序

通議大夫守太子賓客東都副留守雲騎尉贈尚書左僕射博陵崔孝公

宅陋室銘記

大曆十一年四月

公諱沔字若冲博陵安平人其先出於齊太公之後自亭伯三世文宗祕書監

六闕一字

派別叔軌季則俱死王事神謙神通並高循績子彭宏度以武幹稱景

雋巨倫以文行著繼方面者累代列史傳者十人奕葉相承恆為鼎族曾祖宏

峻隋銀青光祿大夫趙王長史祖儼皇朝益州雒縣令父暲年未四十為庫部

員外郎因擇能吏為壽安令又充江西道廉察使徙醴泉遂歷四邑盤桓不進

以剛正也累至朝散大夫汝州長史封安平縣男贈衛尉少卿公即安平之次

子也全德天至成人玉立蓋聖代之寶臣華宗之孝子文章之哲匠禮樂之祖

師既不可以一名又何能以悉數年二十四舉鄉貢進士考功郎李迥秀器異

之曰王佐才也遂擢高第其年舉賢良方正對策萬數公獨居第一而兄渾亦在甲科典試官梁載言陳子昂歎曰雖公孫暹郗不及也召見前殿拜麟臺校書郎絲是名蓋天下御史張思敬以德行薦久之以資授陸渾主簿平陽王敬暉宏度外之交略上官之禮丁府君憂服除太夫人勉起之以所試超邁擢拜左補闕遷殿中侍御史奉勅按竊金者公得其情許之不死竟得減論諸王或恃貴不遵法度舉而按之其不吐茹也如此尋遷起居舍人當扈從以親老抗疏乞退薦瑯琊王邱太原郭潏渤海封希顏等自代睿宗嘉之特許留司以遂其孝養遷祠部員外郎倖僧有請度人者公拒不奉詔遷給事中大理卿韓思復用法小差權臣致劾公特寬之遷中書省舍人省改紫微其官仍舊又固辭以親老除虞部郎中開元初攝御史中丞或訟吏曹之不平公與崔泰之銜命詳理多所收拔俄而卽真兼都畿按察使歲或不稔公請發粟賑貸之賴全活者以萬數內謁者霍元忠有罪公執之以聞元宗使以璽書勞之公之澄清中外也以畿縣令長陸景融劉體微盧暉有異政丞尉宋遙皇甫翼陳希烈宋鼎

蕭隱之苑冬芬楊慎餘劉日正高昌寓州掾李瑱裴曠等並以清白吏疏而薦之二十二年置十道採訪使公所舉六人在焉執事子有不法者公舉之不回移著作郎尋遷祕書少監修圖書使尋判大理卿禮部侍郎公既職司典禮乃刪寫疏論數百卷以備闕遺特加朝散大夫遷左庶子丁太夫人憂徵拜中書侍郎出爲魏州刺史乃肇移元城徙置新市吏人便之乙丑歲元宗東封知頓使奏課第一賜絹二百匹嶽下觀禮獻慶雲頌又賜絹一百匹明年入朝分掌十銓公與王邱爲選人所歌曰沔人澄明澈底清邱山介直連天峻時人躋之還州以理有異績御史大夫崔隱甫中丞宇文融朝服表薦璽書寵慰無何徵拜左散騎常侍上以六宮親蠶絲賜近臣公獻御絲賦又侍讌別殿賦端午詩屢蒙錫以縑帛綵羅兼判國子祭酒俄充東都副留守十七年有事陵廟追贈安平公及太君曰安平夫人駕還罷留守二十年春奉勅撰龍門公宴詩序賜絹百匹延入集賢院修老子道德經疏行於天下二十一年遷祕書監修撰如故屬耕耜田爲居守賜絹百匹遷太子賓客出兼懷州刺史二十四年罷州又

以本官充東都副留守累加通議大夫二十七年冬十一月十有七日寢疾薨於位春秋六十有七元宗震悼贈禮部尚書葬日量借手力幔幙故吏前監察御史博陵崔頌爲公行狀云公德充符契精貫人極孝愛聞於天下制作垂於無窮執太夫人之喪徒跣吐血以身爲糞土況乎舍宏內恕夷坦外名德至矣乎今之達者若以富貴崇德行藏養高則老萊闕於榮親黔婁褊於謀道又加於古人矣故養則致其樂喪則過乎哀以兄姊之戚亞其親甥姪之慈甚其子至於藥砭備物溫清異宜手胝杵臼之間身辱澣濯之伍汲汲然矣每至宗廟心齋嚴恭祀事明發不寐翌日餘悲故聲氣感人者深儀形化人者遠躬踐五德退讓於恭儉溫良行張四維加信於仁義禮智而老驥伏櫪以鮑驄不忘白鳩巢檐以家瑞終黔則非殊倫絕輩擬議乎萬一矣太常博士裴總議曰公醇一誕靈文明含粹蹈元和以爲天性籍間氣以爲人師前後歷官或拜而不至或至而不留瘠形瞽目誓尊孝養可不謂孝乎遂謚曰孝公凡所著文集二十九卷並嗣子祐甫論次先志一卷爲三十卷吏部員外郎趙郡李華爲集序云

公之侍親也孝達乎神祇居憂也哀貫乎天地喪明有數而茹荼終身親交鄰里飢者待公而炊寒者待公而裘烝嘗之奠待公而具故祿廩雖厚而未常足也傳祖禰之美合於禮經見公文章知公行事則人倫之序理亂之源備矣祐甫純行而文直清而和希公門者謂公存焉亡賢數載如此初太夫人患目公傾家求醫或曰療之必愈恐壽不得延太夫人及公悲恨而罷自是竭力奉養不脫冠帶者僅三十年每至良辰美景勝引佳遊必扶持左右笑言陳說親朋往來莫知太夫人之有苦也公年官雖高至於食菓蔬菜與子姪躬自植藝澆灌以申馨潔泉終喪雖見孩稚者必設位束帶盡哀以禮之公與江夏李邕友善爲校書郎時引邕館於祕閣之下讀書者累年邕由是才名益盛邕與尚書席建侯嘗過公怪乘馬癯羸曰何不於廳前自觀銖飼忽然致殞何以更之公唯而不易他日二公又以爲言公良久則曰每欲發言恐涉有疑於廝養者所以沈吟自媿二公退而謂人曰每想崔公此言使人慚惡如醉延和太極之間公旣留司東都遂鬻所乘馬就故人監察御史張洸子深河南府崇政坊買宅

以製居建宗廟於西南維先太夫人安平郡夫人堂在宅之中儉而不陋淨而不華六十餘年榱棟如故堂東嫂盧夫人所居堂之東北鄭氏李氏姊歸寧所居堂之北五步之外建瓦堂三間以居之雜用舊椽不崇壇無楮堊累歷清要所得祿秩但奉烝嘗資嫂姊給孤幼營甥姪婚姻而已朝服衣馬一皆取其下者唯祭器祭服稱禮焉其室竟不修景夫人大原郡太夫人王氏捐牀帳之後公徙居他室或在賓館而無常所爲常侍時著陋室銘以自廣天寶末子孫灑掃貯書籍劍履而已逆胡再陷洛陽屋遂崩圯唯檐下廢井存焉長子成甫侷儻有才名進士校書郎早卒祐甫能荷先業以進士高第累登臺省至吏部郎中充永平軍節度使尚書李公勉行軍司馬兼侍御史中丞永懷先德明發不寐恐茂烈湮淪一本湮作煙罔垂後裔乃刻陋室銘於井北遺址之前以抒所志某夙仰名教實欽孝公之盛德晚聯臺閣竊慕中丞之象賢又能好我不遺見託論譔探風猷而莫窮萬一涉泉海而豈究津涯操筆強名退增戰慙時則大曆十一年青龍景辰孟夏之月也

梁吳興太守柳惲西亭記

大曆十二年四月

湖州烏程縣南水亭卽梁吳興太守柳惲之西亭也繚以遠峯浮於清流包括氣象之妙實資遊宴之美觀夫構宏材披廣榭豁達其外睽嵐其中雲軒水閣當亭無暑信爲仁智之所創制原乎其始則柳吳興惲西亭之舊所焉世增崇之不易其地按吳均入東記云惲爲郡起西亭毗山二亭悉有詩今處士陸羽圖記云西亭城西南二里烏程縣南六十步跨苕溪爲之昔柳惲文暢再典吳興以天監十六年正月所起以其在吳興郡理西故名焉文暢嘗與郡主簿吳均同賦西亭五韻之作由是此亭勝事彌著間歲頗爲州僚據而有之日月滋深室宇將壞而文人嘉客不得極情於茲憤憤悱悱者久矣邑宰李清請而修之以攄衆君子之意役不煩費財有羨餘人莫之知而斯美具也清皇家子名公之胤忠肅明懿以將其身清簡仁惠以成其政絃歌二歲而流庸復者六百餘室廢田墾者三百頃浮客臻湊迨乎二千種桑畜養盈於數萬官路有刻石之堠吏廚有餐錢之資敦本經久率皆如是略舉數者其餘可知矣豈必夜魚

春躍而後見稱哉於戲以清之地高且才而勵精於政事何患雲霄之不致乎清之筮仕也兩參雋乂之列再移仙尉之任毗贊於蜀邑子男於吳興多爲廉使盛府之所辟薦則知學詩之訓間緝之心施之於政不得不然也縣稱繁舊矣今詔升爲望清當受代而邑人已軫去思之悲白府願留者屢矣真卿重違耆老之請啓於十連優詔以旌清之美也某不佞忝當分憂共理之寄人安俗阜固有所歸雖無魯臣掣肘之患豈盡言子用刀之術由此論之則水亭之功乃餘力也夫知邑莫若州知宰莫若守知而不言無乃過乎今此記述以備其事懼不宣美豈徒愧詞而已哉大曆一紀之首夏也

案柳惲西亭故址在湖州府治西烏程縣治南六十步唐顏真卿作記其同游河東耿漳有詩至宋天聖間縣令方仲弓改建浮玉亭

唐故太尉廣平文貞公宋公神道碑側記

大曆十三年三月

初公任監察御史持服於沙河縣屬突厥寇趙定州河兇懼邢州刺史黃文軌投艱於公公以父母之邦金革無避及賊至城下公爲曉陳禍福其徒有素聞

公威名者乃相率而去之開元末安西都護趙含章冒於貨賄多以金帛賂遺朝廷之士九品以上悉皆有名其後節度范陽事方發覺有司具以上聞元宗切責名品將加黜削公一無所受乃進諫焉元宗納之遂御花萼樓一切釋放舉朝皆謝公衣冠儼然獨立不拜翌日入奏元宗謂公曰古人以清白遺子孫乃卿一人而已公曰含章之賄偶不至臣門非不受也元宗深嘉歎之前碑闕焉故略述於此公第三子渾之爲中丞也方欲陳乞御製碑頌未果而中受譴責旋羯胡作亂事竟不成真卿時忝監察殿中爲中丞屬吏故公孫儼泣請真卿論譔之昭義軍節度觀察使尙書左僕射兼御史大夫平陽郡王薛公曰嵩以文武忠義之姿爲國保障上慕公之德業歎尙無窮次嘉儼之懇誠崇豎莫致迺命屯田郎中權邢州刺史封演購他山之石曳以百牛儼刻字之工成乎半歲磨礪旣畢建立斯崇遠近嗟稱古今榮觀雖大賢爲德樹善庸限於存亡而小子何知附驥托跡於階序真卿刺湖州之日因成文請儼刻其側而志之未及雕鐫而第六子衡因謫居沙州參佐戎幕河隴失守介於吐蕃以功累拜

工部郎中兼御史河西節度行軍司馬與節度周鼎保守燉煌僅十餘歲遂有中丞常侍之拜恩命未達而吐蕃圍城兵盡矢窮爲賊所陷吐蕃素聞太尉名德曰唐天子我之舅也衡之父舅賢相也落魄如此豈可留乎遂贈以駝馬送還於朝大曆十二年十一月以二百騎盡室護歸士君子偉之乃古來所無也上欲特加超獎且命待制於側門十三年春三月吏部尚書顏真卿記

家廟碑後記

建中元年十月

建中元年歲次庚申秋七月癸亥朔鑄畢八月己未真卿蒙恩遷太子少師冬十月壬子男穎封沂水縣男碩新泰縣男姪男頂承縣男頌費縣男頌鄒縣男微軀官階勳爵並至二品子姪八人受封無功無能叨竊至此子孫敬之哉

家廟碑額陰記

高祖記室君國初居此宅號州君舍人君侍焉堂今置廟地高祖妣殷夫人居十字街西北壁第一宅祕書監君禮部侍郎君侍焉號州君居後堂華州君於堂中生焉今充神廚少保君堂今充齋堂廳屋充亞獻終獻齋室

韋公肅為太常博士太常卿鄭餘慶廟有二祖妣疑於祔祭請諸有司公肅議故太師顏真卿祖室有殷柳兩氏二夫人並祔故事則然諸儒不能異

新唐

書儒學傳

唐范傳正謂惟顏魯公張司業家祭不用紙錢

困學紀聞

案以上二條皆言魯公家祭事附錄齋堂記後殷柳二夫人公會祖號州君勤禮之配也

謝公碑陰記

太保謝公東晉咸和中以吳興山水清遠求典此郡郡西至長城縣通水陸今尚稱謝公塘及遷去郡人用懷思刻石記功焉歷代至皇唐天寶末羣盜起公之碑誌失於所在眷求蕪沒深為愴然借舊史遺文敬刊息石公之雅量宏度蓋嗟歎之不足

述

項王碑陰述

西楚霸王當秦之末與叔梁避讎於吳蓋今之湖州也雖滅秦而宰制天下魂魄猶思樂茲邦至今廟食不絕其神靈事迹具見竟陵子陸羽所載圖經大曆七年真卿蒙刺是州十二載姦臣伏法恩命追真卿上都尅期首路竟陵是諗予以故碑顛趾嘗因仍草莽已而復之真卿乃命再加崇樹以紀之時則仲夏方生明之曰

案西楚霸王遺蹟在湖州者卞山有項王走馬埒飲馬池繫馬石山有廟謂之卞王廟梁簡文帝有卞山楚王廟碑記江總有卞山楚廟詩又郡城有廟向在臨湖門子城內每郡守至必設幕於廳祀以軛下牛齊李安民奉佛法不予神牛梁天監末蕭琛遷其廟於州治北楚帝橋下唐狄仁傑奏毀天下淫祀夢項王語之曰吾嘗以陰兵助國家征遼廟得不毀

顏魯公文集卷五

顏魯公文集卷六

寧鄉黃本驥仲良編訂

湘陰蔣 瓌維揚參校

贊

左納言史務滋像贊

嗚呼人方羅織我獨平反周來之徒殺人以媚人而卒亦不免孔子曰無求生以害仁有殺生以成仁而何嘗親密乎行感闕俊臣慘刻吏柄鑿不相入當年公已矣民到於今稱遺直

案史務滋武后相新書附豆盧欽望傳

李侍御寫真贊

并序

前殿中侍御史正議大夫行洛陽縣令隴西李構年三十七

洛陽精堅強項稱賢粉纈圖出風規宛然睟容昭寫卓立神全舉板迎揖吾將答焉

案唐書宰相世系表有兩李構一武后相元素之孫趙郡李氏也此則姑藏房元德之孫隴西李氏也

頌

永字八法頌

側蹲鴟而墜石勒緩縱以藏機弩灣環而勢曲趨峻快以如錐策依稀而似勒掠仿髯以宜肥啄騰凌而速進磔抑趙以遲移

辨

蒲塘辨

土俗所呼博淺水浦與敷音轉爾南有博陽山土人呼為濮陽山濮博聲訛水北有歷下村疑古歷陵也

案今江西九江府德安縣在漢為歷陵縣屬豫章郡唐為江州潯陽縣地至

五代吳順義七年始置德安縣歷代因之禹貢過九江至於敷淺原漢書地

理志云豫章郡歷陵縣有傅易山師古曰傅讀曰敷易即陽字傅易川在南古文以為敷

淺源蔡傳云今江州德安縣博陽山也新莽名曰蒲亭魯公所辨之蒲塘卽其地大中十二年鄭薰移魯公詩記云公轉廬陵郡道出宣州溧水縣南經古左伯桃墓作詩自題於蒲塘客舍則誤以桃墓蒲塘皆在溧水攷桃墓在同州郃陽縣辨見外集薰記魯公經墓作詩是至德二載出爲同州刺史時事其自書於蒲塘客舍是永泰二年二月移吉州司馬道過潯陽時事傳刻於溧水又不知何時事也蓋作詩一地也今陝西郃陽縣自書其詩一地也今江西德安縣刻石又一地也今江蘇溧水縣

題名

華嶽廟題名

皇唐乾元元年歲次戊戌冬十月戊申真卿自蒲州刺史蒙恩除饒州刺史十有二日辛亥次於華陰與監察刺史王延昌大理評事攝監察御史穆寧評事張澹華陰令劉暉主簿鄭鎮同謁金天王之神詞顏真卿題記

東林寺題名

唐永泰丙午歲真卿以罪佐吉州夏六月壬戌與殷亮韋桓尼賈鎰同次於東林寺時則同愔熙怡二公惠秀正義二律師臬楊鷗在焉仰廬阜之鑪峯想遠公之遺烈升神運殿禮僧伽衣覩生法師麈尾扇謝靈運翻涅槃經貝多梵夾忻慕之不足聊寫刻於張李二公耶舍禪師之碑側魯郡顏真卿書記

西林寺題名

唐永泰丙午歲真卿以疎拙貶佐吉州夏六月癸亥與殷亮韋桓尼賈鎰楊鷗憩於西林寺有法真律師深究清淨毗尼之學卽律祖師志恩之上足余內弟正義之阿闍黎也緬懷遠見二公之遺烈導余躋重閣示以張僧繇畫盧舍那佛像臬梁武帝盛線繡鉢袋因寓題歐陽公所撰永公碑陰魯郡顏真卿題

靖居寺題名

唐永泰二年真卿以罪佐吉州聞青原靖居寺有幽絕之致御史韓公涉刺史梁公乘嘗見招欲同遊而不果大曆二年十月壬寅評事章甫已使將歸乃與別駕李闕二字闕二清河房澄同官主簿陸涓甫男七步真卿子姪蔡頤泚頤盱等同

宿於下坊明日及僧明則智清而登禮焉因覩行思天師經始雙泉之靈跡道契律師纂成闕路之祕藏徘徊瞻仰乃援翰而勒於碑陰

碑銘一

周太師蜀國公尉遲公廟碑銘

開元二十六年

天臨有周誕赫元輔屏內藩外經文緯武隱若長城闕如虓虎功縣日月聲蓋寰宇甥舅之國君親是私一本誤作輔統蜀制梁督隴莅茲天命假易奸臣不祇憑

陵君德暴蔑京師我圖匡救三方奮糾綠巾始繫黃龍失守精貫天地義伏羣醜節著誠全死而不朽皇唐御曆景命有融賜縑改葬懋烈昭忠鄴有賢守是爲張公馨香明德乃建閼宮乃建閼宮閼宮有恤乃建豐碑豐碑有崩妖孽遂止幽明載色戩穀無虧享祀不忒

第一千一百二十九唐尉遲迴廟碑閻伯璵撰序顏真卿撰銘蔡有鄰八分

書開元二十六年正月

金石錄目

案通志金石略云顏真卿周太師尉遲公廟碑

在相州蓋誤以魯公撰銘爲撰序并書碑也碑今在安陽縣銘第十句君親

是輔輔乃私字之譌私與下茲抵師叶輔韻已見第二句不應重用

天下放生池碑銘

乾元二年三月

皇唐七葉我乾元大聖光天文武孝感皇帝陛下以至聖之姿屬艱虞之運無少康一旅之衆當祿山強暴之初乾鞏勞謙勵精爲理推誠而萬方胥悅克己而天下歸仁恩信侔於四時英威達於八表功庸格天地孝感通神明故得回紇奚鬻契丹大食盾蠻之屬扶服萬里決命而爭先朔方河東平盧河西隴右安西黔中嶺南河南之師旒纒五年推鋒而効死摧元惡如拉朽舉兩京若拾遺慶緒遁逃已蒙赤族之戮思明跼伏行就沸鼎之誅拯已墜之皇綱據再安之宗社迎上皇於西蜀申子道於中京一日三朝大明天子之孝問安視膳不改家人之禮蒸蒸然翼翼然真帝皇之上儀誥誓所不及已歷選內禪生人以來振古及隋未有如我皇帝者也而猶嫗煦萬類勤唉四生乃以乾元二年太歲己亥春三月己丑端命左驍衛右郎將史元琮中使張庭玉奉明詔布德音始於洋州之興道洎山南劍南黔中荆南嶺南江西浙江西諸道訖於昇州之

江寧秦淮太平橋臨江帶郭上下五里各置放生池凡八十一所蓋所以宣皇

明而廣慈愛也易不云乎信及豚魚書不云乎暨鳥獸魚鼈咸若一本無古之

聰明睿智神武而不殺者非陛下而誰昔殷湯克仁猶存一面之網漢武垂惠

纔致銜珠之答雖流水救涸寶勝稱名蓋事止於當時尚介社於終古豈若我

今日動者植者水居陸居舉天下以爲池罄域中而蒙福乘陁羅尼加持之力

竭煩惱海生死之津揆之前古曾何髣髴微臣職忝方面生丁盛美受恩寢深

無以上報謹緣臯陶奚斯歌虞頌魯之義述天下放生池碑銘一章雖不足形

容明聖萬分之一亦臣之精懇也敢刻金石著其詞曰

明明皇帝臨下有赫至德光天乾元啓蹟緯武戡亂經文御曆孝感神明義形

金石仁覆華夏恩加蠻貊道冠巍巍威深號號邁茲多難克廣丕績慶緒既誅

思明辟易人道助順天心惡逆撲滅之期匪朝伊夕乘此寶祚永康宗祏業威

君親功崇列辟交禪之際粲然明白迴映來今孤高往策去殺流惠好生立辟

率土之濱臨江是宅遂其生性庇爾鱗翮環海爲池周天布澤致茲忠厚罔弗

怡懌動植依仁飛沈受獲流水長者徒稱往昔寶勝如來疇庸允格德力無競
慈悲孔碩相時傳聞尚賴宏益矧在遭遇其忘敷錫真卿勒銘敢告凡百

有唐故中大夫使持節壽州諸軍事壽州刺史上柱國贈太保郭公廟碑

銘并序 廣
德二年

昔申伯翰周降神於維嶽仲父匡晉演慶於筮淮而猶見美詩人騰芳史冊豈
比夫神明積高之壤百二懸隔之都三峯發地而削成九派浮天而噴激炳靈
毓粹奕葉生賢括宇宙而稟和總河山而蘊秀莫與京者其惟郭宗乎其先蓋
出周之號叔號或爲郭因而氏焉代惟太原著姓漢有光祿大夫廣德生孟儒
爲馮翊太守子孫始自太原家焉後轉徙於華山之下故一族今爲華州鄭縣
人夫其築臺見師瘞子致養家承金穴之貴政有露冕之高或哲或謀或肅或
又皆海有珠而鳥有鳳也閎闔之盛其流益光隋有金州司倉諱履球府君懋
其德輝不憎下位石本憎
作屑克己復禮州邦化焉篤生唐涼州司法諱昶府君能
世其業以伸其道遠近宗之不隕厥問生美原縣主簿贈兵部尚書諱通府君

清識澈照博綜羣言始登王畿鬱有休稱石本休作佳道悠運促靡及貴仕垂於後

昆沒而見尊是生我諱敬之府君府君幼而好仁長有全德身長八尺二寸行

中絜矩聲如洪鐘河目電照虬鬚蝟磔進退闕雅望之若神以仲由之政事兼

翁歸之文武始自涪州錄事參軍轉瓜州司倉雍北府右果毅加遊擊將軍申

王府典軍金吾府折衝兼左衛長上原州別駕遷扶州刺史未上除左威衛左

郎將兼監牧南使渭吉二州刺史侍中牛僊客躋君清節奏授綏州遷壽州累

加中大夫策勳中柱國以天寶三載春正月十日遘疾終於京師常樂坊之私

第春秋七十有八乾元元年春二月以公之寶允開府儀同三司司徒兼中書

令上柱國汾陽郡王曰子儀有大勳於王室乃下詔曰故中大夫壽州刺史郭

敬之累君子之行毓達人德才光文武政美中和生此大賢為我良弼頃以

孽胡稱亂黔首罹殃朕於是鬱興神武之師克掃欃槍之氣一本氣作勢而子儀帥

彼勁卒赫然先驅取京洛如拾遺翦凶殘猶振槁功存社稷澤潤生人是用寵

洽哀榮義申存歿可贈太保於戲君體含宏之素履秉冲邈之高烈言必主於

忠信行不違於直方清白爲吏者之師死生敦交友之分端一之操不以夷險
槩其懷堅明之姿不以雪霜易其令用情不閒於疎遠泛愛莫遺於賤貧拳拳
服膺終始靡二故所居則化所去見思人到於今稱之斯不朽矣傳曰德盛必
百代祀其有後也宜哉恭惟令公先皇之佐命臣也少而美秀長而瓌偉姿性
質直天然孝悌寬仁無比騎射絕倫所莅以清白見稱居常以經濟自命弱冠
以邦鄉之賦驟膺將帥之舉四擢高第有聲前朝三爲將軍再守大郡累典兵
要必聞休績天寶末安祿山反於范陽令公以節度使擁朔方之衆圍高秀巖
於雲中破史思明於嘉山先帝之幸朔方赴行在於靈武擊同羅於河曲走崔
乾祐於蒲坂今上之爲元帥也首副旄鉞會回紇於扶風摧凶寇於涑水追餘
孽於陝服長驅河洛弼成睿圖再造生靈克清天步又函夏之未又安天下之
未安一年之間區宇大定不休哉一本不
作豈不徒觀其元和降精間氣生德感星辰
而作輔應期運以濟時忠於國而孝於家威可畏而儀可象盛德繫物寬仁厚
下用人由己從善如流沈謀祕於鬼神精義貫於天地推赤誠而許國冒白刃

以率先電擊於雲雷之初鷹揚於廟堂之上凡二歷鼎司兩升都座四作元帥
九年中書歷事三聖而厥德維懋易相二十而受遇益深蓋剋復上都者再戡
定東京者一其餘麾城擯邑得雋摧鋒亦非遽數之所周也信可謂王國虓虎
生人廢庠者歟非太保之邁種不孤則何以鍾美若是況乎友于著睦轡龍虎
者十人貽厥有光紆青紫者八士一本士作九勳庸舉集今古莫儔昔奮號尊榮紅
粟纔霑於萬石憚家全盛朱輪不出十人繇我觀之事不侔矣於戲清廟之興
所以仁祖考鴻伐之刻亦以垂子孫爰剗制於舊居將永圖而觀德中堂有恤
丕構克崇感霜露而怵惕以增敘昭穆而敬恭斯在庶乎觀盥禹若既無斃於
永懷入室優然必有覲乎其位哀榮既極情禮用申仁人之所及遠哉孝子之
事親終矣豈唯温温孔父遠稱讒鼎之銘穆穆魯侯獨美龍旂之祝其詞曰

郭之皇祖肇允號土逮於後昆實守左輔徙華陰兮其一源長流光施於司倉涼

州兵部克熾而昌載德深兮其二篤生太保允懋厥道神之聽之永錫難老式如

金兮其三於穆令公汾陽啓封文經武緯訓徒涉空簡帝心兮其四舍一不二格於

天地愷悌君子邦之攸暨貊德音兮其五芝馥蘭芳羽儀公堂子子孫孫為龍為

光鏘璆琳兮其六乃立新廟肅雍允劭神保是聽孝思孔炤亶居歆兮其七乃立高

碑威美奚斂日月有既徽猷永垂映來今兮其八廣德二年歲次甲辰十一月甲

午朔二十一日甲寅建

晉紫虛元君領上真司命南嶽夫人魏夫人仙壇碑銘大曆三年

夫人諱華存字賢安任城人晉司徒劇陽文康公舒之女也師於小有清虛真

人王裒哀命中候上仙范邈為立傳其略云夫人挺瓊蘭之流映體自然之靈

璞志逸雲霞明潔鮮蔚天才卓異元標幽拔少讀老莊三傳五經百子無不該

覽性樂神仙味真慕道少服胡麻散茯苓丸吐納氣液攝生夷靜親戚往來一

無關見常欲別居閒處父母不許年二十四強適太保掾南陽劉君幼彥生二

子璞遐幼彥後為修武令夫人心期幽靈精誠苦盡逮子息粗立乃離隔室宇

齋於別寢清修百日忽有太極真人安度明東華大神方諸青童扶桑碧河湯

谷神王景林真人小有仙清虛真人王裒來降裒謂夫人曰聞子密緯真氣太

帝君敕我授子神真之道青童曰清虛爾之師也度明曰子苦心求道道今來矣景林曰虛皇鑒爾勤感太極已注子於玉札子其最哉青童又曰子不受聞

上道內法晨景玉經者仙道無緣得成也後日當會陽洛山中爾勤密之矣王

君乃命侍女

一本王作三

開玉笈出太上寶文八素隱身大洞真經

一本真作冥

高仙羽

元等書三十一卷手授夫人焉此皆王君昔遇南極夫人西城真人王方平於

陽洛山所受之本經也山中有洞臺是清虛之別宮王君至是北向祝誓於夫

人曰太上三元九皇高真虛微八道上清玉晨裒爲太帝所敕於魏華存王君

又說太極白簡青籙金刻玉文有得見此三十一卷書者之姓名也凡此寶書

起自清虛真人受太師西城王君紫元夫人從是當七人得之以白玉爲簡青

玉爲字至夫人爲四矣於是景林又授夫人黃庭內景經令晝夜誦讀萬遍乃

得洞觀鬼神此乃不死之道也於是四真吟唱各命玉女彈琴擊鼓吹簫合節

而發歌歌畢王君乃解語夫人向所授書存思指歸寶經節度行事口訣諸要

粗訖徐乃別去凡二夕一日共會在曲靜之中自此之後王君及西城真人諸

元君夫人互有來往或與隔壁共庭初不駭悟已而幼彥以暴疾殞世直天下荒亂夫人撫養內外旁救窮乏超羣先覺乃攜細小徑來東南及兒息各大並處官位至於守靜之思與日而進也凡在世八十三年以成帝咸和九年歲在甲午王君乃與東華青童來降與夫人靈藥兩劑使頓服之刻期會於陽洛宮夫人服藥稱疾閉目寢息飲而不食七日夜半太乙元仙遣鸞車來迎夫人用藏景之法託形神劍化成死骸始終外朗仙化內逸冥變隱適從此而絕子璞時爲庾司空司馬遐時爲陶太尉從事中郎安城太守故夫人自此隱化淪景須臾至陽洛山明日青童君太極四真人清虛王君三天法師張道陵等凡四十七真人降教夫人於隱元之臺王君令夫人清齋五百日讀大洞真經并分別登真祕奧道陵授以新出明威章奏入靜存祝吏兵符籙之訣衆真各標至訓三日而去道陵所以備教委曲者以夫人在世爲女官祭酒領職理故也夫人遂修齋讀經誦言萬過積十六年顏如少女於是龜山九靈太真西王母金闕聖君南極元君乃共來迎夫人遂白日昇晨北詣上清宮玉闕之下太微天

帝中央王老君三素高元君太上玉晨大道君太素三元君扶桑太帝君金闕後聖君各令使者致命授夫人玉札金文位爲紫虛元君領上真司命南嶽夫人比秩仙公使治天台大霍山洞臺之中主下訓奉道教授當真仙者而男之高仙曰真人女曰元君於是夫人受錫事畢王母及金闕聖君南極元君各去使夫人於王屋小有之中更齋戒三日畢九微元君龜山王母三元夫人馮雙禮珠晨諸衆仙并降夫人於小有清虛上宮絳房之中時夫人與王君爲賓主焉神肴羅陳金觴四奏各命侍女陳曲成之鈞九雲合節八音零粲於是西王母擊節而歌歌畢馮雙禮珠彈雲璈而答歌餘真人各歌須臾司命神仙請隸屬及南嶽神靈迎官並至虎旗龍輦激曜數百里中西王母諸真乃共與夫人東南行俱詣天台霍山臺又便道過句曲金壇茅叔申宴會二日二夕又共適於霍山夫人安駕玉宇然後各別初王君告夫人曰學者當去疾除病因授甘草丸所謂穀仙方也夫人服之而仙夫人能隸書爲王君立傳事甚詳悉又述青精劔針註黃庭內景經自後屢降茅山子璞後至侍中蒙使傳法於司徒瑯

瑯王舍人楊羲護軍長使許穆穆子玉斧並昇仙事具陶宏景真誥所呼南真
卽夫人也初夫人旣渡江徧遊名山至臨川郡臨汝水西立壇置精舍院東百
餘步造冢壙又於石井山建立壇場往來遊憩歲深久榛蕪淪翳雖備載圖經
而略無遺跡有唐女道士黃令微道行高遠八十而有少容蹠屣而行奔馬不
及時人見其顏色殊異號曰華姑聞夫人靈跡長壽二年歲在壬辰冬十月乃
訊於洪州西山道士胡超超能通神明遙指郭南六里烏龜原有石龜每犯田
苗被人擊首析其處是也姑與道流尋訪見龜在壇中央其下得尊像油甕鋸
刀燈盞之類俄夢夫人指九曲池於壇南獲之磚砌猶在景雲中睿宗使道士
葉善信將繡像幡花來修法事仍於壇西洞靈觀度女道士七人開元初玄宗
使醮祭祈禱不絕每有風雨或聞簫管之聲入室禮謁必須嚴潔不爾必有虵
虎驚吼之異時時有雲如烏鳥羣飛垂帶直下壇上倏忽不見西出如向井山
前後非一已而華姑舂嚙間如有告者曰井山古跡汝須崇建俄聞異香從西
南來姑行宿洞口聞鐘磬之音遲明入山果遇壇殿餘址遂建立屋宇屢聞仙

梵之響環壇數里有採斫及不精潔者必有怪異之驚有野鹿中箭來投華姑姑爲拔之後每齋前則銜藕蓮以獻姑開元九年姑欲上昇告弟子曰勿釘吾棺可以絳紗冪之已而雷霆震擊紗上有孔大如雞卵棺中惟有被覆木簡屋上穿可容人座前奠瓜數日生蔓結實如桃者二每至忌辰則風雨鬱勃直入室內玄宗聞而駭之覆視明白使道士蔡偉編入後仙傳二十九年春三月乙酉使道士齋龍壁來醮忽有白鹿自壇東出至冢間而滅五色仙蛾集壇上刺史范陽張景佚以爲聖德感應立碑頌述天寶八載以夫人得道昇仙之所度女道士二人見修香火大曆三年真卿叨刺是州言崇禮謁郊郭蒙濛萑蒲震驚女弱曹逃豺狼窟聚真儀如在壇殿巋然瞻仰徘徊悄焉若失有仙壇觀道士譚仙巖者修真自遠法侶是宗請以男官黃道士二七人抽隸洞靈共申灑掃高行女道士黎瓊仙七人萃居壇院精力住持已久率勵往來增修觀宇從之不日通暨厥成仙跡之載崇師之力也敢備其本末而爲頌云銘曰

紫虛元君維魏夫人位列五嶽名高七真凝華台允奪志劉嬪太帝昭懸清虛

降神羣仙畢會玉笈斯陳服道日損精心益勤蛻形神劍託馭鸞輪適抵陽洛
湍登隱元黃庭朗詠白日昇晨西降王母東過叔申傳法侍中許楊爲鄰伊昔
南渡爰居汝濱壇場處所埋沒荒榛實賴華姑諗於胡尊果獲靈跡烏龜之原
次尋井山實叶曩言嫣然簡解紗冪空存野鹿銜藕靈瓜吐根怪異昭彰不可
殫論二聖竦駭屢崇明禋于嗟女弱香火堙淪真卿刺州謁拜斯頻乃命仙子
增修鼎新華姑侍傍異代同塵曷表元德銘功翠珉垂諸來裔垓北無垠

撫州臨川縣井山華姑仙壇碑銘

大曆四年

華姑者姓黃氏諱令微撫州臨川人也少乃好道丰神卓異天然絕粒年十二
度爲天寶觀女道士年八十髮白面紅如處子狀時人謂之華姑蹠履而行奔
馬不及聞魏夫人仙壇在州郭之南草木榛翳結廬求之不得長壽二年歲在
壬辰冬十月壬申朔訪於洪州西山胡天師天師名超能役使鬼神見其懇切
遙指姑所居南二百步曰烏龜原中有石龜每蹂踐田苗百姓患之乃擊斷其
首卽其處也明日與姑登山顧望西面有池水焉天師謂姑曰池中有所見乎

曰無師遂舉左手令姑自腋下觀之四仙浴焉師曰爾有道分必當得之因留與語數日既還至州虔誠尋訪遂獲石龜於壇中央掘其下得尊像及刀鋸各一油甕五口燈盞數十箇天后聞之盡收入內姑嘗於旦夕精思想象之間忽有告曰壇南有九曲池汝可開之姑從而獲焉磚砌盡在他日有異香綵雲從西南而來其夕夢有人謂姑曰井山道場何不修葺姑未及往忽然感疾姑悔之曰得非違尊教所致乎翌日病愈又聞異香而宿於谷口聞鐘聲遲明入山果獲壇殿池砌餘址半峯有自然石井深可三尺闊丈餘故名井山天欲雨則雲霧先起姑既置精舍時聞仙梵之音環壇五七里間莫敢樵採姑遂灑掃修葺極其力焉人或不潔不誠必遭蛇虎怪異之警迷不能出矣至今猶然有野鹿爲獵人所射來姑前姑爲拔箭其後每至齋時卽銜蓮藕以獻姑前開元九年欲上昇之際忽謂弟子曰不須釘吾棺可以絳紗冪之數夕有雷震電繞視紗頂孔如雞卵屋穿容人棺中惟覆被木簡而已弟子奠瓜數日生蔓長數尺結實二顆其大如桃姑同學弟子黎瓊仙恆服茯苓胡麻絕粒四十餘秋八十

齒髮不衰六七歲時親覩其事每至忌辰卽風雲蒼鬱直入室內村野路人往往見綵雲白鶴飛入洞口清齋行道時每有一朱鬃白馬在壇側逼之則奔而出外捨之則隨而復來靈異昭彰不可談悉仙臺觀道士譚仙巖史元同左通元等每至三元恆修齋醮大曆三年真卿獲刺是州明年春三月山下有女道士曾妙行夢一女師令上七層華樹層層掇淪及寤猶飽因是不食嘗於觀見黎瓊仙跪而拜曰夢中所見乃尊師也因請依之於今覺韶顏潤澤虔修香火於此山遐邇駭慕焉嗚呼麻姑得道於名山南真昇仙於龜原華姑鶴翥於茲嶺瓊仙妙行接踵而去非夫天地胥蟻從古以然則何以仙氣氤氳若斯盛者真卿幸因述職親覩厥猷若默而不言則來者奚述乃爲銘曰

綽約華姑真仙品徒芳蓮比色逸俊爭驅南郭從魏西山訪胡腋窺仙浴原獲龜烏靈跡旣儼曲池猶污鼎新廟貌煥然規模名曰井山終焉不逾鹿來藕獻馬見鬃朱簡解空存紗穿上徂奠瓜吐實藹室雲趨妙行精持高真是俞勒銘

翠琬永播玄都

華蓋山王郭二真君壇碑銘

粵以江南之地佳麗垂名山嶽之間宛有仙洞余祇膺聖澤廉察臨川一日按地理圖得屬邑崇仁縣華蓋山有王郭二真君壇存焉欣覩異事未原其始他日公餘因令軍將往山下訪求碑銘果得一石記乃隋開皇五年焚修道士李子真於壞碑上再錄出其文則知王郭二真君仙不顯名王則方平之從姪郭乃王之族弟也

郭不應爲王之族弟族字疑誤

始於金華山修道以圖輕舉尋遊洞府自玉笥

山將之麻姑洞中道悅一山問故老曰此爲何山對曰巴陵華蓋山也二真君相與言曰此山福地名亦異焉因求卜止再煉神丹山下父老詣而再拜曰敢問真人之名字曰吾等修志於虛無不欲述焉後有一道士來謁敢問真人之師曰吾師浮邱先生則上界大仙也頃於金華山遇焉二真君能走石飛符與雲致雨或有人疾苦暴亡往而告之卽飛符以救之歲時大旱卽致霖雨以濟之至晉惠帝元康二年二月一日綵雲連晝仙樂喧風二真君乃驂鸞駕鶴冉冉上昇今上昇之壇及浮邱先生之壇存焉其後立觀焚修境邑將旱若詣壇

禱之則雲雨立應矣故事昭然仙踪儼若雖遺史籍安泯聲華鸞鶴對飛共作
壺中之客林巒疊秀別含象外之春因與府官議崇觀宇永利焚修尋差軍將
以公用錢詣山換殿宇門廊不日而迴云工畢矣予德慚好道任忝分符原始
要終罕測沖天之日飛文染翰用貽終古之芳銘曰

玄牝之門澄心養神學則彌衆得者幾人冉冉千古堂堂二真丹成岩谷道應
穹雲綵雲色煥仙樂聲勻遲日初麗柳花正新驂鸞拔俗駕鶴超雲言歸紫府
笑別芳辰山存華蓋長含異春恩流豐澤用濟烝民浮雲世速好月生頻儼若
聖祉永播清芬

顏魯公文集卷六

顏魯公文集卷七

寧鄉黃本驥仲良編訂

湘陰蔣 瓌維揚參校

碑銘二

東莞臧氏紉宗碑銘

德有三孝弟稱其至常有五仁道原其終故與化所自則曰侯其在矣死喪有恤疇能亦莫吾聞鶴鳴於焉譬急難棠棣所以勗跗萼紉宗綏族所貴因之誰其庶乎吾見之於臧氏矣爰自伯禽國魯公子氏疆魚賂大諫於僖哀言聖兩垂於文武朗陵會吳而滅蜀東郡感張而絕袁建義而辭器歸高奮筆而陽秋與直賢明之盛今古莫崇積慶所鍾克生隋驃騎將軍府君諱滿滿生皇朝通議大夫靈州都督府長史府君諱寵寵生銀青光祿大夫銀州刺史贈太子少師諱善德咸懷忠良克績徽烈古稱有後今見其然少師生三子曰右武衛將軍贈幽州大都督闕三字懷慶冠軍左羽林大將軍兼營府都督御史中丞充平

盧節度採訪兩蕃使懷亮河源軍使安北都護右領軍將軍上柱國上蔡縣開
 國侯累贈太常卿魏州刺史工部尚書懷恪皆行冠人倫才兼文武并時迭將
 為國虎臣朔漠之間峻風斯在其功庸志業各具三原縣先塋神道碑懷慶五
 子曰左金吾中郎將范陽節度經略副使希古右威衛將軍中受降城使希真
 殿中監朔方經略副使希賓原州長史監牧副使希咄銀青北平太守仍充軍
 使希逸懷亮五子曰勝州都督朔方節度副使敬廉金紫文安太守范陽節度
 副使希莊左清道率幽州經略副使敬之太常卿特進武州刺史今上元帥都
 知兵馬使讓之左監門將軍敬此字疑誤懷恪七子曰右衛中郎將贈闕州刺史
 希崇豐州別駕贈宋州刺史希昶左驍衛中郎將贈太子賓客希忱忠武將軍
 贈汝州刺史希愔壯武將軍左威衛中郎將贈秘書監希景雲麾麟寧三州刺
 史左金吾將軍左街使贈揚州大都督希晏魯國公希讓並稟訓義方不從閔
 閔遭逢明盛備展材良能挺矯饒之姿學蘊韜鈴之略糅蘭玉而輝映階庭畫
 隼熊而光聯旗軾勳庸之盛當世無倫源長流深德盛祀遠開元天寶間宗族

之紆青紫佐麾幢者已數十百人迨乎今上當宁而諸孫冠軍左羽林將軍贈
太子詹事彥英忠武左清道率瑗左清道率贈少府監彥侄金紫太僕卿涉特
進殿中監玠左金吾大將軍彥璟正議湖州長史隨並不幸早世銀青棣州刺
史瑜特進殿中監慈州刺史瑀特進鴻臚卿均特進太常卿彥昭開府太常卿
彥暘正議杭州別駕巽銀青鴻臚少卿渙鴻臚卿躋朝散明州長史叔獻少府
監楚卿朝散台州司馬晉卿朝散洋州司馬叔雅符寶郎齊卿涇陽縣闕雲卿
左金吾衛長卿千牛叔卿京兆府參軍叔清文闕

晉侍中右光祿大夫本州大中正西平靖侯顏公大宗碑銘 大曆六年

公諱含字宏都瑯琊臨沂人其先出於邾顏公子友封於邾是爲小邾子爲魯
附庸居於鄒邑因以命氏孔門達者八人曰路回辛驕祖噲僕何次有丁闔叔
子率躡秦有芝貞漢有肆異安樂魏有斐盛盛字叔臺青徐二州刺史關內侯
始自魯居瑯琊代傳恭孝故號所居爲孝悌里生欽字公若明韓詩禮易尚書
多所通說學者宗之歷大中大夫東莞廣陵太守葛繹貞子生默字靜伯晉汝

陰太守護軍將軍生公少有操行以孝聞兄畿咸寧中死託夢當復生發棺而氣息甚微闔家營視母妻不能無倦公乃絕棄人事躬親侍養足不出戶者十有三年次嫂樊氏失明須髯蛇膽尋求不得忽有青衣童子持囊授公乃蛇膽也尋出戶化成青鳥飛去東海王越以爲太傅參軍元帝過江爲丞相祭酒東宮初建公以儒素篤行補太子中庶子遷黃門侍郎本州大中正封西平縣侯拜侍中除吳郡太守公所歷簡而有思明而能斷然以威風御下王導歎曰顏公在事吳人斂手矣未之官復爲侍中國子祭酒光祿勳以年老遜位成帝美其素行就加右光祿大夫門施行馬賜牀帳被褥勅大官四時致膳固辭不受時論者欲爲王導降禮馮懷以問於公公曰吾聞伐國不問仁人向馮祖思問佞於我我有邪德乎或論少正卯盜跖惡孰深公曰隱伏之姦非聖不誅衆咸服焉郭璞嘗欲爲公筮公曰自有性命毋勞著龜桓温求婚以其盛滿不許因誠子孫曰自今任官不可過二千石婚姻勿貪世家或問羣士優劣答曰周伯仁之正鄧伯道之清卞望之之節餘則吾不知致仕二十餘年年九十二薨諡

曰靖三子髦謙約并有聲譽公喪在殯而鄰家失火髦與二弟抱柩號叫燦爛垂至忽爾頓絕時人以爲孝感事見晉書髦字君道少纂家業惇於學行儀狀巖整風貌端美桓公見而歎曰顏侍中廊廟之望也尙書郎國大中正給事黃門侍郎以父老不就加給事中晉陵臨川太守侍中本州大中正加秩中二千石光祿勳西平定侯事具約孫延之集生緝字文和騎都尉襲西平侯生靖之字茂宗宣城太守司徒諮議御史中丞生騰之字宏道善草隸書有風格治書御史度支校尉巴陵太守生炳之字叔豹以能書稱奉朝請輔國江夏王參軍生見遠字見遠方正不合於俗梁書云博學有志行齊治書御史俄兼中丞正色立朝有當官之稱高祖受禪不食發憤慟哭而絕武帝恨之曰我自應天從人何預天下人事而顏見遠乃至於此生協字子和湘東王記室梁書有傳生之推字介北齊中書舍人給事黃門侍郎平原太守嘗著觀我生賦云展白下以流漣以靖侯已下七葉墳塋皆在故也生思魯愍楚集序思魯自作事見本傳入隋生遊秦思魯字孔歸博學善屬文尤工詁訓隋司經校書長寧王侍讀

東宮學士嘗與劉臻講論經義臻屈服焉高祖入關率男師古相時勤禮育德奉迎於長春宮授儀同秦王記室國史温大雅傳云大雅在隋與思魯俱在東宮弟彥博與愍楚同直內史省彥將與遊秦并典校祕閣二家兄弟各爲一時人物之感少時學業顏氏爲優其後職位温氏爲盛勤禮字敬幼而朗悟識量宏遠工於篆籀尤精詁訓祕閣司經史籍多所刊定歷校書郎著作郎與兄師古相時俱以文學爲崇賢宏文館學士太宗使蕭鈞讚曰依仁服義懷文守一履道自居下幃終日德彰素里行成蘭室鶴鑰馳譽龍樓委質終著作郎生昭甫字周卿少聰穎而善工篆隸草書與內弟殷仲容齊名而勁利過之特爲伯父師古所賞凡所注釋必令參定焉爲天皇曹王侍讀曹王屬有獻古鼎篆書二十餘字舉朝莫能讀昭甫盡識之贈華州刺史真卿表謝批答曰卿之乃祖嘗爲碩儒旣高倚相之能遂有臧孫之後不墜其業在卿之門二子元孫惟貞元孫字聿修聰銳舉進士考功郎劉奇特標榜之歷太子舍人專掌令畫元宗讚之曰孔子亞聖魯國稱賢翰墨之妙莫之與先累至滌沂濠三州刺史贈祕

書監五子春卿明經拔萃蜀縣尉舉茂才偃師丞杲卿字昕常山太守祿山反
開土門拜衛尉卿兼中丞贈太子太保諡曰忠節曜卿工草隸五言以文學直
崇文館淄川司馬旭卿善草書允山令茂曾篤行頗好詰訓健爲司馬惟貞字
叔堅有德行詞學尤善草隸屢登甲科太子文學薛王友累贈太子少保事具
陸據神道碑七子闕疑孝友仁讓專精詩傳杭州參軍允南孝悌聰銳工爲詩
判屢入高等與春卿杲卿曜卿同日爲侍郎席建侯所賞歷左補闕時真卿爲
殿中侍御史正至同拱法座蹈舞而衣袂相接者三故允南侍宴詩云誰言百
人會兄弟也霑陪累遷司封郎中國子司業金鄉男喬卿仁友精晉史有吏道
富平尉真長清直舉明經幼輿仁和有醞藉精班漢左尉率府兵曹真卿進士
校書郎舉文詞秀逸醴泉尉清白名聞長安尉歷三院御史兵部員外郎以平
原太守拒祿山凡五爲侍郎右丞三爲尙書四爲御史大夫七爲刺史二爲節
度採訪觀察使魯郡公允臧友悌有吏幹制舉縣令宰延昌拜監察充郭子儀
朔方衣資使遷殿中太子中允江陵少尹再兼侍御史充荆南節度行軍司馬

公子謙安城太守約零陵太守孫綸廷尉熙散騎常侍顯護軍司馬曾孫系之益州刺史延之金紫光祿大夫劭之領軍司馬根晉安太守元孫希之新安太守師伯僕射師仲中書郎浚吏部尚書測臨淮太守夔五兵尚書微之散騎常侍僧度給事中僧超徐州刺史來孫幼明征虜記室昆孫積中書郎翻廣州刺史仍孫誓交州刺史挺山陽太守雲孫之儀周御正中大夫新野公之善隋葉令侍讀十代孫昶寧仁令愍楚侍御史遊秦度支郎中廉州刺史見循吏傳著班漢決疑頤隋汝南侯侍讀十一代孫千里工書殷王主簿師古祕書監宏文崇賢學士相時禮部侍郎天冊學士育德太子通事舍人司經局校定經史利仁祕書郎有意沔州刺史博古博學延陵丞十二代孫中和渝州刺史楊庭蔣王侍讀光庭博學注後漢書涉令趨庭職方郎中吉州刺史欣期著作郎益期詳正學士敬仲仁孝吏部郎中平昌男康成進士太子舍人崇文館學士希莊進士銀青和州刺史日損應制高第大基尉嘉賓少有俊才十三代孫大智并州錄事參軍隱朝進士拔萃河北尉匡朝工五言胸山令元淑鄰幾景靈并校

書郎同寅明經昇庠有詞學富陽令恭敏有德行明漢書武功尉知微制舉伊
闕丞十四代孫温之有志行舉方正司門郎中徵之澹之並明經晃有清節饒
陽司士抱范縣尉允濟好屬文榆次尉振高陵丞摺援挺據撰并明經挺有
詞理萬年尉式宣清修進士殿中侍御史茂齊淳謹漢州司法舒俊才制舉長
安尉說明經有才器渭南丞順孝悌進士評事勝進士左補闕怡好爲詩渾博
涉有文太子通事舍人方僑進士宮門丞十五代孫逸好文武康令鱗長安尉
廣成將軍泉明孝義佐父開土門彭州司馬季明子幹詡沛頗及外甥沈盈盧
逖祿山反死難並贈五品官翽敦敏通義令覲綿州參軍顥闕一西令慈明都
水穎河南府功曹校書郎頰孝明經大理司直頤奉禮部頤江陵頤河中顥鳳
翔參軍頤當陽主簿願千牛頂武功丞頤頤當是頤之誤工隸書太子洗馬頤頤並京
兆參軍翽峴頤頤已見前當是頤之誤顥頤頤盈枝並未仕通明項城尉韶有才氣工
詩策進士濮陽尉明華陽尉啓温江尉襲華陰尉亞邱守道不仕其餘枝派繁
衍不可具載於戲吾祖以志行純粹感通神明貽謀子孫奕葉無改其後忠義

孝悌文學才業布在青史粲然可知非夫德盛流光何能若是真卿小子懼不克荷頓自撫州代到獲展舊山雖碑版沈淪而邱封儼在敢揚不朽之烈庶竭罔極之恩銘曰

鑠吾祖渡江浦孝通神明軼古凡七葉葬白下本支分源流溥世忠義疊規矩翬鸞皇炳龍虎文睢渙學鄒魯赫才明振區宇亘今昔難悉數嗟末孫慚下武揚耿光媿無取豐碑立百世觀

有唐茅山元靖先生廣陵李君碑銘

并序
曆八年 大

先生姓李氏諱含光廣陵江都人本姓宏以孝敬皇帝廟諱改焉二十一代祖宏江夏太守避王莽徙居晉陵遂爲郡人高祖文疑陳桂陽王國侍郎曾祖榮皇朝雷州司馬祖師龕隱居以求其志徙於江都父孝威博學好古雅修彭聃之道與天台司馬鍊師子微爲方外之交尤以篤慎著於州里考行議諡曰正隱先生母瑯琊王氏賢明有德先生孩提則有殊異晬日獨取孝經如捧讀焉羈牢好靜處誦習墳典年十八志求道妙遂師事同邑李先生遊藝數年神龍

初以清行度爲道士居龍興觀尤精老莊周易之深趣執喪過哀口不嘗甘旨之味食惟穡麥而已封殖膳羞皆出其手號毀骨立親族莫不傷之開元十七年從司馬鍊師於王屋山傳受大法靈文金記一覽無遺綜核古今該明奧旨元宗知先生偏得予微之道乃詔先生居王屋山陽臺觀以繼之歲餘請居茅山纂修經法頻徵皆謝病不出天寶四載冬乃命中官賚璽書徵之旣延入禁中每欲諮稟必先齋浴他日請傳道法先生辭以足疾不任科儀者數焉元宗知不可強而止先生嘗以茅山靈蹟翦焉將墜真經祕籙亦多散落請歸修葺乃特詔於楊許舊居紫陽以宅之仍賜絹二百匹法衣兩副香爐一具御製詩及序以餞之又禁於山側採捕魚獵食暈血者不得輒入公私祈禱咸絕牲牢先生以六載秋到山是歲詔書三至渥澤頻繁暉映崖谷初山中有上清真人許長史楊君陶隱居自寫經法歷代傳寶時遭喪亂散逸無遺先生春詔搜求悉備其跡而進上之先時元宗將求大法請先生爲師先生竟執謙沖辭疾而退洎七載春元宗又欲受三洞真經其年春之三月中官賚璽書云其月十八

日尅受經誥是日於大同殿潔修其事遂遙禮先生爲元師并賜衣一襲以伸師資之禮因以元靖爲先生之嘉號焉仍詔刻石於華陽洞宮以誌之是歲夏五月隱居先生合丹之所有芝草八十一莖散生於松石之間詔俾先生與中官啓告靈仙緘封表進夏又詔以紫陽觀側近二百戶太平崇元兩觀各一百戶並蠲其官徭以供香火秋七月又徵先生既至請居道觀以養疾九載春辭歸舊山其年夏六月前生靈芝之所又產三百餘莖煌煌秀異人所莫覩先生又圖而奏之是歲冬又徵先生於紫陽別院館之十載秋先生又懇辭告老御製序詩以餞之十有一載先生奉詔與門人韋景昭等於紫陽之東鬱岡山別建齋院立心誠肅是夜仙壇林間徧生甘露因以上聞特詔嘉異初隱居先生以三洞真法傳昇元先生昇元付體元先生體元付正一先生正一付先生自先生距於隱居凡五葉矣皆總襲妙門大正真法所以茅山爲天下道學之所宗矣於戲是非可齊也我物均焉生死可忘也覺夢同焉如此者何域心於變化之際哉先生以大歷己酉歲冬十一月十有四日遁化於茅山紫陽之別院

春秋八十有七其年十二月八日門人赴喪而至者數千人號奉冠舄遷窆於雷平山之西陲遺命以松棺竹杖木几水瓶香奩香爐置於藏內門弟子等仰奉嘉猷克遵儉德先生器識真淳業行高古道窮情性之本學冠天人之際所以優游句曲鬱爲王者之師出入明庭特寵肩輿之貴是知順風而問昔稱於黃帝望山而請今見於元宗矣又博覽羣言長於著撰嘗以本草之書精明藥物事關性命難用因循著音義兩卷又以老莊周易爲潔淨之書著學記義略各三篇內學記二篇以續仙家之遺事皆名實無違詞旨該博初先生幼年頗工篆籀而隸書尤妙客或賞之云賢於其父因投筆不書元宗詔山人王旼強請先生楷書上經一十三紙以備楊許之闕先生能於陰陽術數之道而不以藝業爲能極於轉鍊服食之事而不以壽養爲極但冥懷素樸妙味元津非夫博大之至人孰能盡於此真卿乾元二年以昇州刺史充浙江節度欽承至德結慕元微遂專使致書於茅山以抒誠懇先生特令韋鍊師景昭復書於真卿恩眷綢繆足勵超然之志然宗師可仰望紫府而非遙王事不遑寄白雲而悠

遠洎大歷六年真卿罷刺臨川旋舟建業將宅心小嶺長庇高蹤而轉刺吳興事乖夙願徘徊郡邑空懷尊道之心瞻望林巒永負借山之記而景昭洎郭閱等以先生茂烈芳猷願銘金石乃邀道士劉明素來託斯文真卿與先生門人中林子殷淑遺名韋渠牟嘗接采真之遊緒聞舍一之德敢強名於巷黨曷足辨於鴻蒙其詞曰

抱一混茫人之紀綱先生以之氣王神強乃啓元旨元門以彰乃爲帝師帝道惟康甘露呈瑞靈芝效祥上士云感高風載揚鶴返仙廟雲辭帝鄉退歸而老妙識行藏德本無累道心有常實曰形解孰云坐亡伐石表墓勒銘傳芳谷變陵遷厥跡彌光

湖州烏程縣杼山妙喜寺碑銘

大曆九年春

州西南杼山之陽有妙喜寺者梁武帝之所置也大同七年夏五月帝御壽光閣會所司奏請置額帝以東方有妙喜佛國因以名之舊置在州西金斗山唐太宗文皇帝升極之六年春二月移於此山山高三百尺週迴一千二百步蓋

昔夏杼南巡之所今山有夏王村山西北有夏駕山皆后杼所幸之地也晉吳興太守張元之吳興疏云烏程有墟名東張地形高爽山阜四周卽此山也其山勝絕遊者忘歸前代亦名稽留山寺前二十步跨澗有黃浦橋橋南五十步又有黃浦亭並宋鮑昭送盛侍郎及庾中郎賦詩之所其水自杼山西南五里黃檠山出故號黃浦俗亦名黃檠澗卽梁光祿卿江淹賦詩之所寺東偏有招隱院其前堂西廈謂之溫閣從草堂東南屈曲有懸巖徑行百步至吳興太守何楷釣臺西北五十步至避宅城按說文云宅蛇也上古患蛇而相問無宅乎蓋往古之人築城以避宅也有處士竟陵子陸羽杼山記所載如此其臺殿廊廡建立年代並具於記中大歷七年七當作八真卿蒙刺是邦時浙江西觀察判官殿中侍御史袁君高巡部至州會於此土真卿遂立亭於東南陸處士以癸丑歲冬十月癸卯朔二十一日癸亥建因名之曰三癸亭西北於藁桂之間創桂棚左右數百步有芳林茂樹悉產丹青紫三桂而華葉異各樹桂下有支徑以袁君步焉因呼爲御史徑真卿自典校時卽考五代祖隋外史府君與法言所

定切韻引說文蒼雅諸字書窮其訓解次以經史子集中兩字已上成句者廣而編之故曰韻海以其鏡照原本無所不見故曰鏡源天寶末真卿出守平原已與郡人渤海封紹高實族弟今太子通事舍人渾等修之裁成二百卷屬安祿山作亂止具四分之一及刺撫州與州人左輔元姜如璧等增而廣之成五百卷事物嬰擾未遑刊削大歷壬子歲真卿叨刺於湖公務之隙乃與金陵沙

門法海前殿中侍御史李崕陸羽國子助教州人褚沖評事湯衡清河丞太祝

柳察舊刻魯公文集載杼山寺碑有評事湯衡清河丞太祝柳察二人留元剛撰公年譜引此條作湯某柳察檢湖州府志進士表代宗朝有烏程楊衡

注云杼山集作湯衡字仲師大理評事又石刻竹山連句凡十有八人中有湯清河一人也而姓名互異一云湯某一云楊衡一云湯清河以杼山

記文法論柳察既以太祝書其官即不應又加清河丞二字皆衍文也湖志所謂是湯君之名故竹山連句適與之合然則碑內衡丞二字皆衍文也湖志所謂

楊衡字仲師者當另是一人湯君之名偶與清河縣名相同傳寫者誤加丞字於下校公集者以評事下僅存湯姓因移烏程楊衡之名以實之元剛撰譜知

衡字有誤因以某字代其名今長城丞潘述縣尉裴循常熟主簿蕭存嘉興尉編公集仍從舊本而附辨於此

陸士修後進楊遂初崔宏楊德元胡仲南陽湯涉顏祭一本作顏察章介左興宗顏

策以季夏於州學及放生池日相討論至冬徙於茲山東偏來年春遂終其事

前是顏渾正字殷佐明魏縣尉劉茂括州錄事參軍盧鏗江寧丞韋寧壽州倉曹朱弁後進周愿顏暄沈殷李甫亦嘗同修未畢各以事去而起居郎裴郁祕書郎蔣志評事呂渭魏理沈益劉全白沈仲昌攝御史陸向沈祖山周闐司議邱悌臨川令沈咸右衛兵曹張著兄蕃弟薦蔞校書郎權器興平丞韋桓尼後進房夔崔密崔萬竇叔蒙裴繼姪男超峴愚子頎顧往來登歷時杼山大德僧皎然工於文什惠達靈煜味於禪誦相與言曰昔廬山東林謝客有遺民之會襄陽南峴羊公流潤甫之詞況乎茲山深邃羣士響集若無記述何以示將來乃左顧以求蒙俾記詞而葺事銘曰

夏侯南巡山名是因梁王東揆寺榜攸詢形勝天絕規模鼎新避宅城古垂釣臺堙棚以桂結浦由黃申二庾迢遞三癸嶙峋徑列御史傳紆逸人紛吾著書羣彥惠臻韻海鏡源自秋徂春編同貫魚學比成麟幸托勝引亟倍僧珍庶斯見傳金石不泯

浪跡先生元真子張志和碑銘

大曆九年

士有牢籠太虛檄腋元造擺元氣而詞鋒首出軋無間而理窟肌分者其惟元真子乎元真子姓張氏本名龜齡東陽金華人父遊朝清真好道著南華象罔說十卷又著沖虛白馬非馬證八卷代莫知之母留氏夢楓生腹上因而誕焉年十六遊太學以明經擢第獻策肅宗深蒙賞重令翰林待詔授左金吾衛錄事參軍仍改名志和字子同尋復貶南浦尉經量移不願之任得還本貫既而親喪無復宦情遂扁舟垂綸逐三江泛五湖自謂烟波釣徒著十二卷凡三萬言號元真子遂以稱焉客或以其文論道縱橫謂之造化鼓吹京兆韋諳爲作內解元真又述太易十五卷凡二百六十有五卦以有無爲宗觀者以爲碧虛金骨兄浦陽尉鶴齡亦有文學恐元真浪跡不還乃於會稽東郭買地結茅齋以居之閉竹門十年不出吏人嘗呼爲掬河夫執畚就役曾無忤色又欲以大布爲褐裘服徐氏聞之手爲執纊一製十年方暑不解所居草堂椽柱皮節皆存而無斤斧之跡文士效柏梁體作歌者十餘人浙江東觀察使御史大夫陳公少遊聞而謁之坐必終日因表其所居曰元真坊又以門巷湫隘出錢買地

以立閨闔旌曰迴軒巷仍命評事劉太真爲敘因賦柏梁之什文士詩以美之者十五人旣門隔流水十年無橋陳公遂爲剏造行者謂之大夫橋遂作告大夫橋文以謝之常以豹皮爲屐驪皮爲屨隱素木几酌斑螺盃鳴榔杖拏隨意取適垂釣去餌不在得魚肅宗嘗賜奴婢各一元真配爲夫婦名夫曰漁僮妻曰樵青人問其故曰漁僮使捧釣收綸蘆中鼓柁樵青使蘇蘭薪桂竹裡煎茶竟陵子陸羽校書郎裴修嘗詰問有何人往來答曰太虛作室而共居夜月爲燈以同照與四海諸公未嘗離別有何往來性好畫山水皆因酒酣乘興擊鼓吹笛或閉目或背面舞筆飛墨應節而成大歷九年秋八月訊真卿於湖州前御史李崕以縑帳請焉俄揮灑橫掃而纖纒霏拂亂搶而攢毫雷馳須臾之間千變萬化蓬壺髣髴而隱見天水微茫而昭合觀者如覩轟然愕眙在坐六十餘人元真命各言爵里紀年名字第行於其下作兩句題目命酒以蕉葉書之援翰立成潛皆屬對舉席駭歎竟陵子因命畫工圖而次焉真卿以舴艋旣敝請命更之答曰儻惠漁舟願以爲浮家泛宅沿沂江湖之上往來茗雪之間野

夫之幸矣其詼諧辨捷皆此類也然立性孤峻不可得而親疎率誠澹然人莫窺其喜愠視軒裳如草芥屏嗜欲若泥沙希跡乎大丈夫同符乎古作者莫可測也忽焉去我思德茲深曷以真懷寄諸他山之石銘曰

邈元真超隱淪齊得喪甘賤貧泛湖海同光塵宅漁舟垂釣綸輔明主斯若人豈烟波終此身

元真子姓張名志和魯國公顏真卿與之友善真卿為湖州刺史與門客會飲乃唱和為漁父辭其首唱即志和之詞真卿與陸鴻漸徐士衡李成矩共唱和二十五首遞相誇尚

續仙傳

張志和字子同婺州金華人顏真卿為湖州刺史志和來謁真卿以舟敝漏請更之志和曰願為浮家泛宅往來苕霅間辨捷類如此

新唐書隱逸傳

唐故通議大夫行辭王友柱國贈祕書少監國子祭酒太子少保顏君碑

銘 建中元年七月

昔孔悝有彝鼎之銘陸機有祠堂之頌皆可以發揮祖德敷演家聲故君子之

觀其銘也既美其所稱又美其所爲無而稱之是誣也有而不述豈仁乎論而
撰之敢不祇懼君諱惟貞字叔堅其先出於顓頊之孫祝融融孫安爲曹姓其
裔邾武公名夷甫字顏子友別封邠爲小邾子遂以顏爲氏多仕魯爲卿大夫
孔門達者七十二人顏氏有八戰國有率牖秦有芝貞漢有異肆安樂其後喪
亂譜牒淪亡魏有裴盛盛字叔臺青徐二州刺史關內侯始自魯居於瑯琊臨
沂孝悌里生廣陵太守給事中葛繹貞子諱欽字公若精韓詩禮易尙書學者
宗之生汝陰太守護軍襲葛繹子諱默字靜伯生晉侍中光祿大夫西平靖侯
諱含字宏都隨元帝過江已下七葉葬在上元幕府山西生侍中光祿勳西平
定侯諱鬣字君道事具孝行傳生州西曹騎都尉西平侯諱緄字文和生宣城
太守御史中丞諱靖之字茂宗生巴陵太守度支校尉諱騰之字宏道善草隸
書有風格梁武帝草書評云顏騰之賀道力並便尺牘少行於代生輔國江夏
王參軍諱炳之字叔豹以能書稱生齊持書御史兼中丞諱見遠字見遠和帝
被弑一慟而絕梁武深恨之事見梁周北齊書生梁鎮西記室參軍諱協字子

和感家門事義不求聞達元帝著懷舊詩以傷之撰晉仙傳五篇日月災異圖
兩卷文集二十卷見梁書生北齊給事黃門侍郎待詔文林館平原太守隋東
宮學士諱之推字介著家訓二十篇冤魂志三卷證俗字音五卷文集三十卷
事具本傳黃門兄之儀周御正御史中大夫麟趾學士隋文輔政不署矯詔索
璽又拒之出爲集州刺史新野公後朝朔望引之御榻曰見危授命臨大節而
不可奪古人所重何以加卿事具周書弟之善隋葉令子孫見於後黃門生皇
秦王記室諱思魯愍楚遊秦小記室字孔歸君之曾祖也隋司經校書東宮學
士率子弟奉迎義旗於長春宮招瓜州拜儀同博學善屬文自爲父集序國史
稱溫大雅在隋與思魯同事東宮彥博與愍楚同直內史省彥將時與遊秦同
典校祕閣二家兄弟各爲一時人物之選少時學業顏氏爲優其後職位溫氏
爲盛溫氏譜亦載焉生勤禮字敬君之祖也幼而朗悟識量宏遠工於篆籀尤
精詁訓解褐校書郎與兩兄弟師古相時同時爲宏文崇賢學士弟育德又於
司經校定經史當代榮之太宗嘗令師古讚崇賢學士以兄弟特命蕭鈞讚之

曰依仁服義懷文守一履道自居下帷終日德彰素里行成蘭室鶴鑰馳譽龍樓委質著作郎修國史夔府長史贈號州刺史生昭甫敬仲殆庶無恤少連務滋辟強昭甫字周卿君之父也幼而穎悟尤明詁訓工篆籀草隸書與內弟殷仲容齊名而勁利過之特爲伯父師古所賞重每有著述必令參定嘗得古鼎二十餘字舉朝莫識盡能讀之高宗侍讀曹王屬贈華州刺史真卿表謝肅宗批答卿之乃祖嘗爲碩儒旣高倚相之能遂有臧孫之後不墜其業在卿之門生我伯父諱元孫臬君伯父聰穎絕倫尤工文翰舉進士考功郎劉奇特標榜之由是名動海內累遷太子舍人元宗監國專掌令畫嘗和遊苑詩批云孔門稱哲宋室聞賢翰墨云捷莫之與先歷滁沂濠三州刺史贈祕書監君仁孝友悌少孤育舅殷仲容氏蒙教筆法家貧無紙筆與兄以黃土掃壁木石畫而習之故特以草隸擅名天授元年糊名考試判入高等以親累授衢州參軍與盈川令楊炯信安尉桓彥範相得甚歡又選授洛州溫縣永昌二尉每選皆判入高科侍郎蘇味道以所試示介衆曰選人中乃有如此書判嗟歎久之遂代兄

爲長安尉太子文學以清白五爲察訪使魏奉古等所薦五邸初開盛選僚屬
拜薛王友柱國伯姊御史大夫張知泰妻魯郡夫人亡將葬數家占君不利臨
壙君哭而拒之曰豈有亡手足之痛牽拘忌而忍自絕乎弗從其年七月才生
明違疾而歿教義者隱而傷焉與會稽賀知章陳郡殷踐猷吳郡陸象先上谷
寇泚河南源光裕博陵崔瓌友善事具陸據所撰神道碑累贈祕書少監國子
祭酒太子少保真卿表謝肅宗批答云卿之先人德行優著學精百氏藝絕六
書頻擢甲科屢升循政曳裾王府名右鄒枚載筆春宮道高徐阮旣而壽乖華
髮器紆青雲業載史臣慶傳令子追存盛美褒贈崇班且旌善於義方俾揚名
於有後濠州生春卿杲卿曜卿旭卿茂曾春卿工詞翰倜儻有吏才蘇頲舉茂
才偃師丞杲卿文理清峻所居有聲太常丞攝常山太守祿山反擒其心手開
土門拜衛尉卿兼中丞城陷杲卿叱詈之遂被鉤舌支解而終贈太子太保諡
曰忠節真卿表謝肅宗批答云自羯胡猖狂入我河縣所在官吏多受迫脅卿
兄以人臣大節獨制橫流或俘其謀主或斬其元惡當以救兵懸絕身陷賊廷

旁若無人歷數其罪手足寄於鋒刃忠義形於顏色古所未有朕甚嘉之曜卿
工詩書草隸十五以文學直崇文館淄川司馬旭卿善草書允山令茂曾好屬
文詁訓仁厚絕衆健爲司馬君生闕疑允南喬卿真長幼輿真卿允臧闕疑仁
孝有吏能精詩傳善剖判杭州參軍允南仁孝有清識工詩人多誦其佳句善
草隸與春卿杲卿曜卿同日於銓庭爲侍郎席建侯所賞達奚珣薦爲左補闕
真卿時爲殿中正至三拱法座舞蹈而衣袂相接者三故允南賦詩云誰言百
人會兄弟也霑陪歷殿中膳部司封郎中國子司業金鄉男喬卿仁和有吏幹
富平尉真長清直早世幼輿方雅有醞藉通班漢左清道率府兵曹真卿早孤
蒙伯父泉允南親自教誨舉進士歷校書制舉醴泉尉陟清白長安尉三院御
史四爲大夫六爲尙書再爲採訪節度充禮儀使光祿大夫魯郡公允臧敦質
孝悌有吏能制舉延昌令監察充朔方衣資使殿中三爲侍御史中允江陵少
尹荆南行軍濠州及君孫泉明佐父開土門彭州司馬威明邛州司馬季明子
幹沛翊頗誕及外孫博野尉沈盈盧逖並爲逆胡所害各蒙贈五品京官濬好

屬文翹華正顓慈明都水使者顓好五言校書頰仁孝方正明經大理司直嶺南營田判官執喪九日不食頡河陽尉顓鳳翔參軍頡工小楷洗馬頡恭仁奉禮郎並早喪逝紘方義主簿臬觀並沒蠻襲明微明德明未仕通明獲嘉尉將明昌明尉克明崇文明經衛密標榜之翹有德行文詞華原主簿準溧水尉觀頗工文襄陽尉觀有文行宏文進士顓仁友清白常熟令封金鄉男頰清介勤學侍郎蔣冽賞其判京兆兵曹襲金鄉男岫仁純常熟主簿任城男頡浚儀尉頡清源尉頂幹辨揚府法曹願長厚清白朝邑尉頡左率倉曹碩祕書正字頡有吏幹歙州錄事參軍曲阜男頡好爲詩富陽尉禹好爲文常州參軍並粗有所立君之諸祖父羣從陽庭頡並侍讀強學益期並學士中和至誠敬仲大智温之澂之澹之搢挺援撰温泳陵並明經康成強學希莊日損隱朝隣幾知微舒說順勝式宣韶並進士制舉有意中和趨庭希莊至刺史利仁明天文欣期元淑景靈並校書光庭注後漢書嘉賓千里昇庠匡朝怡滔渾允濟搢逸觀不器防有文詞博古少連恭敏惇學行敬仲温之以孝聞潤有風義冕鱗邈迢以

清白稱其餘咸著官族不獲悉數洪惟累祖之耿光不業有若子泉宏都之德
行巴陵記室之書翰特進黃門之文章祕監華州之學識肇自魯國格於勝代
紛綸盛美遂舉集於君君能遵前人不敢失墜其志事以忝聿修宜其克饗尊
榮爲清廟不祧之主真卿幸承遺訓叨受國恩旣受無疆之祿敢揚不朽之烈

銘曰

系我宗邾顏公子封鄆魯附庸亞孔聖浴沂風刺青徐給事中護營柳渡江楓
侍兄疾感地童鄰火斷珥貂重施七葉傳孝恭武騎都尉司從便尺牘繼魚蟲
慟君難憤而終咨記室遊湘東嗟御正凜移忠臬黃門擅文雄三韶長事東宮
四穆叔史牢籠褻華州詰訓通小祕監盛名鴻維少保文翰工莅畿赤五褻崇
登望苑友桂叢三超贈保儲宮流光感廟貌融永不祧垂無窮

顏魯公文集卷七

顏魯公文集卷八

寧鄉黃本驥仲良編訂

湘陰蔣環維揚參校

神道碑銘一

河南府參軍贈祕書丞郭君神道碑銘

天寶九載五月

夫騏驥千里之足踣於庭唐之內鴻鵠四海之志儕於墜滲之羽

一本儕作輟

此個

儻奇偉之士所為歎息者也取之於人在於郭君矣君諱揆字良宰太原人也

郭本號叔之後春秋泉漢細侯得政事之美有道冠人倫之目素絲作詠青溪

招隱信為多士宜稱盛族五代祖昶隋驃騎大將軍開府儀同三司高祖澄皇

朝朔方道大總管涇鄜坊慶丹延夏七州刺史贈荊州都督諡曰忠曾祖某朝

散大夫太子洗馬祖義朝議大夫贈鄭州刺史父虛己銀青光祿大夫守工部

尚書兼御史大夫蜀郡大都督府長史持節充劍南節度支度營田副大使本

道并山南西道採訪處置使上柱國贈太子太師諡曰獻君生而聰明不為戲

弄之事長而清峻罔雜綺紈之流辯對則江夏之童志意則山東之妙大夫府君以其于氏之出故幼名封奴嘉有應務之器故長字良宰蓋取待封宰割之義也觀其言必顧行動必由禮讀書不取其糟粕爲仁罕忘於造次亦足以保其嘉名楚之正則漢之臺卿乃其比也年十七崇文生明經及第侍郎韋陟揚言於朝稱其稽古之力許其青冥之價後調集侍郎李彭年嗟君所判足冠後生擢才子於公庭賀大夫於私第美聲洋溢時莫與京授太常寺太祝加敬蒞事陳信正辭每巡陵及郊必有歌詠潘河陽藉田之賦顏光祿明祀之作復見前賢之致矣無何改授河南府參軍天寶五載大夫總渡瀘之師繫君奉循陔之養南中污下遂得氣疾先大夫憐其寢劇命訪秦醫太夫人懼其不起繼自蜀至何神不禱靡藥不嘗依親自強望父增歎以天寶八載二月十八日終於安興之私第時年二十四皇帝聞而悼之贈祕書丞嗚呼斯人不起子丕未識亦可爲長慟者矣君子曰夫孝弟之至絜矩之道文章之絕周旋之儀可謂成人矣方將培雄風罩白石憐乎得二幾乎第一是以其疾卽御醫坐門其亡卽

天使歸贈陳師境上推以雨露之私修文地下贈以蓬萊之職弔客多其文行
操誅盡於作者以五月二十一日葬於首陽山大塋之側君志也先大夫懿其
天姿親疏行狀敘其參元之美歎其老成之風方崇南峴之碑以慰西門之感
伏滔受遇爲人父也若斯祈奚至公其知子也如此斯文未建頽山遂及太夫
人東海于氏凌虛墜翼開緘悼心望汝絕歸來之期抱孫有無時之哭遂成刊
刻之意以寄零落之哀銘曰

粲粲門子菲菲國香家傳玉樹人詠金相風流小褚才貌潘郎一經自達六義
名揚聞於密啓實此周行爲子道備從親路長旣銘絕壁亦奉垂堂霧露成病
膏肓遂亡天向京兆墳歸洛陽江堙初流水毀寒霜茫茫蔓草蕭蕭白楊苦月
墳上豐碑道傍披文相質誰不沾裳

祕書省著作郎夔州都督長史上護軍顏公神道碑

乾元二年

君諱勤禮字敬琅琊臨沂人高祖諱見遠齊御史中丞梁武帝受禪不食數日
一慟而絕事見梁齊周書曾祖諱協梁湘東王記室參軍文學有傳祖諱之推

北齊給事黃門侍郎隋東宮學士齊書有傳始自南入北今爲京兆長安人父
諱思魯博學善屬文尤工詁訓仕隋司經局校書東宮學士長寧王侍讀與沛
國劉臻辯論經義臻屢屈焉學書黃門傳集序君自作後加踰岷將軍太宗爲
秦王精選僚屬拜記室參軍加儀同娶御正中大夫殷英童女英童集呼顏郎
是也更唱者二十餘首温大雅傳云初君在隋與大雅俱仕東宮弟愨楚與彥
博同直內史省愨楚弟遊秦與彥將俱典祕閣二家兄弟各爲一時人物之選
少時學業顏氏爲優其後職位温氏爲盛事具國史君幼而朗悟識量宏遠工
於篆籀尤精詁訓祕閣司經史籍多所刊定義寧元年十一月從太宗平京城
授朝散大夫勳解褐祕書省校書郎武德中授右領左右府鎧曹參軍九年十
一月授輕車都尉兼直祕書省貞觀三年六月兼行雍州參軍事六年七月授
佐郎七年六月授詹事主簿轉太子直監加崇賢館學士官廢出補蔣王文學
宏文館學士永徽元年三月制曰君學藝優敏宜加獎擢拜陳王屬學士如故
遷曹王友無何拜祕書省著作郎君與兄祕書監師古禮部侍郎相時齊名祕

監與君同時爲崇賢宏文館學士禮部爲天策府學士弟太子通事舍人育德
又奉令於司經局校定經史太宗嘗圖書崇賢諸文學士命祕監爲讚以君祕
監兄弟不宜相褻述乃命中書舍人蕭鈞特讚君曰依仁服義懷文守一履道
自居下帷終日德彰素里行成蘭室鶴鑰馳譽龍樓委質當代榮之六年以後
夫人兄中書令柳奭親累貶夔州都督府長史顯慶六年加上護軍君安時處
順恬無愠色不幸遇疾傾逝於府之官舍旣而歸窆於京城東南萬年縣寧安
鄉之鳳栖原先夫人陳郡殷氏泉柳夫人同合祔焉禮也七子昭甫晉王曹王
侍讀贈華州刺史事具真卿所撰神道碑敬仲吏部郎中事具劉子元神道碑
殆庶無恤辟非少連務滋皆有學行以柳令外甥不得仕進孫元孫舉進士考
功員外劉奇特標榜之各動海內從調以書判入高等者三累遷太子舍人屬
元宗監國專掌令畫滌沂濠三州刺史贈祕書監惟貞頰以書判入高等歷畿
赤尉丞太子文學薛王友贈國子祭酒太子少保德業具陸據神道碑會宗襄
州參軍考楚州司馬澄左衛翊衛潤倜儻涪城尉曾孫春卿工詞翰有風義明

經拔萃犀浦蜀二縣尉故相國蘇頌舉茂才又爲張敬宗劍南節度判官偃師丞杲卿忠烈有清識吏幹累遷太常丞攝常山太守殺逆賊安祿山將李欽湊開土門擒其心手何千年高邈遷衛尉卿兼御史中丞城守陷賊東京遇害楚毒慘下詈言不絕贈太子太保諡曰忠節曜卿工詩書草隸十六以詞學直崇文館淄川司馬旭卿善草允山令茂曾訥言敏行頗工篆籀健爲司馬闕疑仁孝善詩春秋杭州參軍允南工詩人皆諷誦之善草隸書判類入等第歷左補闕殿中侍御史三爲郎官國子司業金鄉男喬卿仁厚有吏材富平尉真長耿介舉明經幼輿敦雅蘊藉通班漢書左清道率府兵曹真卿舉進士校書郎舉文詞秀逸醴泉尉黜陟使王鉷以清白名聞七爲憲官九爲省官洊爲節度採訪觀察使魯郡公允臧敦實有吏能舉縣令宰延昌四爲御史充太尉郭子儀判官江陵少尹荆南行軍司馬長卿晉卿邠充國質多無祿早世名卿偁偁俱倫並爲武官元孫紘通義尉沒於蠻泉明孝義有吏道又開土門佐其謀彭州司馬威明邛州司馬季明子幹沛翊泉明男誕及君外曾孫沈盈盧逖並爲逆

賊所害俱蒙贈五品京官濬好屬文翹華正顯並早天穎好五言校書郎穎見後當

是穎之誤家廟碑云穎好五言校書穎仁孝方正明經大理司直充張萬頃嶺南營田判官顓鳳

翔參軍穎通悟穎善隸書太子洗馬鄭王府司馬鄭王上一字並不幸短命通明好

屬文項城尉翽温江丞覲絲州參軍覲鹽亭尉顓仁和有政理蓬州長史慈明

仁順幹蠱都水使者穎介直河南府法曹頓奉禮郎頡江陵參軍頡當陽主簿

頡河中參軍項衛尉主簿願左千牛頡頡並京北參軍頡須頡並童稚未仕自

黃門御正至君父叔兄弟衆子姪揚庭益期昭甫強學十三人四世爲學士侍

讀事見柳芳續卓絕殷寅著姓略少監少保以德行詞翰爲天下所推春卿杲

卿曜卿允南而下臬君之羣從光庭千里康成希莊日損隱朝匡朝昇庠恭敏

鄰幾元淑敏温之舒說順勝怡渾允濟挺式宣韶等多以名德著述學業文翰

交暎儒林故當代謂之學家非夫君之積德累仁貽謀有則何以流光末裔錫

美盛時小子真卿聿修是忝嬰孩集慕不及過庭之訓晚暮論譎莫追長老之

口故君之德美多恨闕遺銘曰闕銘

攝常山郡太守衛尉卿兼御史中丞贈太子太保謚忠節京兆顏公神道

碑銘乾元二年正月

公諱杲卿字昕京兆長安人也北齊黃門侍郎諱之推之來孫隋太子校書東宮學士皇朝秦王府記室參軍諱思魯之元孫著作郎崇賢宏文館學士贈號州刺史諱勤禮之曾孫高宗晉邸侍讀曹王屬贈華州刺史諱昭甫之孫濠州刺史贈祕書監諱元孫之第二子也公方正精敏有清識周旋有則進止闕詳起家江州司法轉遂州嘗爲刺史所責公守正不爲之屈時人稱之遷鄭州司兵開元與兄春卿弟曜卿從父弟允南俱從調吏部皆以書判超等同日於銓庭爲侍郎席建侯所賞翰林拭目焉擢授魏郡錄事參軍當官正色舉劾無所迴避採訪使張守珪以清白聞遷范陽郡戶曹安祿山雅聞其名奏爲營田判官光祿太常二寺丞又請爲節支判官兼攝常山郡太守天寶十四載冬十一月祿山反范陽至橐城公與長史袁履謙同謁乃矯授公紫履謙緋因令崇州刺史李欽湊以兵七千人守土門公罷歸途中指章服諷履謙曰與公受他此

色如何履謙亦感激之士遂與公定謀翻之恐事洩潛使男安平尉泉明往來計議又使西通王承業北結賈循循敗族滅屬祿山使其心手高邈往范陽公使姪壻豪城尉崔安石密伺其歸以圖之冬十二月二十日以私號召欽湊未至會祿山害東京留守李愷中丞盧奕判官蔣清傳首脇並海諸郡前二日真卿以平原太守斬其使令外甥盧逖以購祿山敕送於饒陽常山後二日逖至公悲喜不自勝猶未敢宣示其夕欽湊至公俾參軍李峻馮虔靈壽尉李栖默泉土人翟進玉縋於城南門密令驛長蔡行儀醉以酒而斬之履謙入告公與相持而泣喜其事之集也遂使峻栖默開土門又斬其副使潘惟慎是夜高邈迴宿浦城公命馮虔翟進玉崔安石馳捕邈繫其肘而縛之虔領赴郡俄頃醴泉驛候騎報何千年發趙郡安石以進玉馳襲而擒之如高邈遂給以榮王琬哥舒翰官軍二十萬入土門告於列郡遂使郭仲邕詐爲先鋒以中官領御騎六十徇以南諸郡於是趙郡殺賊刺史馬道貞鉅鹿殺劉拯廣平殺郭子昂曲州殺清河太守崔審交皆以其首至先是真卿守平原而饒陽前聞景城樂安

博平清河七郡皆相與拒賊至是博陵上谷文安信都鉅鹿廣平魏趙鄴與常
 山十郡皆卻為國家守乃使張通幽以兄通儒相賊乞隨泉明以自雪至太原
 與尹王承業同惡竊為己功留泉明等不遣承業從弟隨中官入奏皆蒙超獎
 拜公衛尉卿兼御史中丞追赴京以履謙為太守深為司馬泉明為左金吾兵
 曹制書未至春正月賊使平盧兵馬使史思明寇諸郡思明既來攻六日城平
 糧井皆竭遂為賊所陷男季明外甥盧逖皆遇賊遂以公履謙至東京祿山讓
 公曰我擢汝為太守何負於汝而乃反乎公曰吾代受國恩官職皆天子所與
 汝叨受恩寵乃敢悖逆吾寧負汝豈負本朝乎臊羯胡狗何不速殺我乃繫公
 於天津橋南柱令割肉以自噉公詢詈不已遂鉤以斷舌問更敢爾否公猶盛
 氣含胡以應之還被支解而終觀者痛心焉楊國忠受通幽詭說賈深又不證
 明竟不蒙恤問乾元元年夏五月二十八日肅宗乃追贈太子太保子姪為賊
 所害者八人孫誕姪詡詡當從家廟勸禮二碑作翊 杲卿之孫從言旁名誕其姪不應亦從言旁蓋杲卿姪有名翹翺翽翽者其名從
 也羽旁 先質於賊皆被鋸殺至是贈季明詡左右贊善誕義王諮議姪子幹都水

使者沛尚食奉御頗洗馬遯鄭王友從父甥博野尉

遯上脫
盧字

沈盈大理正封夫

人崔氏清河郡太夫人授泉明鄆縣令男威明太僕丞姪男翹漢州司馬孫証
左內倉曹訊兵書諡公忠節從父弟國子司業允南洎真卿表謝蒙批答曰自
逆胡猖狂入我河縣所在官吏多所迫脇卿兄以人臣大節獨制橫流或俘其
謀主或斬其元惡當以援兵懸絕身陷賊庭傍若無人歷數其罪手足寄於鋒
刃忠節形於顏色古所未有朕甚嘉之盛烈既冠於當時寵名宜及於泉壤初
公被懸首於右金吾街樹有張湊若哀其髮收謁元宗俄見夢云禦捍處多兵
馬少元宗哭而設祭焉後湊以髮至夫人疑之憑牀而哭忽聞聲如鞭牀者發
箱跳而前夫人方駭信之明年春正月葬於京城鳳棲原先塋西北禮也昔七
代祖中丞府君慟絕於梁武五代伯祖御正府君抗璽於隋文而公精貫白日
義形宗社今又繼之爲不隕矣嗚呼公與真卿偕陷賊境懸隔千里稟義莫由
天難忱斯小子不死而公死痛矣哉銘曰

太保烈烈抗茲忠節殉國義形見危身殺元宗杖信售詐凶羯寵極災挺稱兵

向闕河朔鼎沸潼關晝閉天下寒心王旒若贅蛇豕十萬萃如霜雪公以眇身毅然奮發逆黨株送土門披抉人知効忠國用不艱恩寵三座榮加九列王命未臨孤城已滅身懸鋒刃口誓不絕先聖感忠保儲贈揭刻諸金石思表墓綴遠莫致之留斯江滋日月有旣徽猷無缺

正議大夫行國子司業上柱國金鄉縣開國男顏府君神道碑銘

寶應元年

君諱允南字去惑京兆長安人也高宗侍讀贈華州刺史昭甫府君之孫薛王友贈太子少保惟貞府君之第二子也少以詞藻擅名兼工草隸書尤善五言詩深爲伯父濠州刺史元孫府君之所賞愛開元十五年以挽郎選糊名考判入高第授鶉觚尉後與從父兄春卿杲卿曜卿調集皆爲吏部侍郎席建侯所賞重時論榮之尋授右武衛兵曹二十六年丁內憂以毀聞服闋轉右領軍錄事參軍與從祖姑子劉同昇齊名長又相善嘗寓書與之中書舍人孫逖見而驚歎曰古人之作尋爲同昇江南經略判官遷大理評事從調吏部侍郎達奚珣以書判超等薦爲朝廷左補闕元宗嘗撰華嶽碑并書天寶九載令御史大

夫王鉞打百本以賜朝臣家獲二本者四族而君以兩省官弟真卿以殿中侍御史居其一焉每正至朝賀宰相以下登殿者不過三十人而君與真卿王鉞法服於含元殿蹈舞而衣接焉朝覲宴集必同行列故君賦詩云誰言百人會兄弟皆霑陪與諫議大夫鄭審郎中祁賢之每應制及朝廷唱和必警絕佳對人人稱說之俄遷殿中侍御史以忤楊國忠貶襄陽丞移河東司戶京兆士曹十五年長安陷輿駕幸蜀朝官多出駱谷至興道房琯李煜高適等數十人盡在中丞田良邱爲哥舒翰行軍司馬旣敗猶自振矜因誦表云翰北行師未當挫衄蓋緣運數潛迫人神同棄職之人故匪翰之由衆皆默然君獨抗聲叱之曰公何得尙爲賊說徵祥乎峘等因欲毆擊魏仲犀與之同罪遜詞引去不敢枝梧一座皆壯之恩詔召拜尙書屯田員外郎加朝散大夫遷司膳郎中真卿至自河北元宗給君驛至鳳翔令相見從肅宗入西京遷司封真卿以尙書兼大夫弟允臧又爲殿中兄弟三人同時臺省當代無比時人欽羨焉尋封金鄉縣開國男累加正議大夫上柱國遷國子司業寶應元年冬十一月真卿自利

州蒙召至上都君遇疾已革闕而泣曰吾忍得見汝因哽咽不自勝其十日傾

逝於私第享年六十九嗚呼明日庚申葬於萬年縣鳳棲原先塋之北祔也二

子穎頰皆好爲五言詩真卿使頰奏事彭原上文章蒙擢校書郎早卒穎簡直

潔己以左衛兵曹選爲侍郎崔器所賞累授河南府士曹噫君幼而聰明長而

美秀仁恕形於造次精識冠於當時善與人交篤於僚友故父執侍郎寇公泚

相國陸公象先尙書韋陟陸公景融重君才名相見未嘗不移日也相國房瑄

尙書韋陟張倚皆篤忘年之契河南陸據彭城劉鍊劉秩隴西李揆河東裴士

淹特敦莫逆之歡河東敬括隴西李華李涵范陽盧允畢盡常僚之好非夫親

仁誠物泛愛虛己則何以廣而能周久而益敬者矣家常有折脛鶴初真卿小

年時戲書其背君切責曰此雖不能奮飛竟不惜其毛羽奚不仁之甚歟其惻

隱者如此真卿終身志之於戲以君之才之美之德之義方當翼亮盛時儀型

宗國道之祝喪頓我遠圖悲乎痛哉真卿孩而不夭太夫人蘭陵郡太夫人殷

氏親自鞠育實賴慈訓粗茲有成至若發慮學文之親立身復禮之道非仁兄

之規誨曷暨所蒙且有師訓之資豈惟孔懷之戚布哀金石未究萬分銘曰
莊嶽熊渾清沂駿奔英靈孕育生我仲昆維我仲昆邦家之藩孝仁是履愷悌
是惇清識冰澈韶儀玉温詞華藻綯翰墨雲繁通究理體精詳政源爰初發跡
屢振瑤琨尉邑何陋評廷不寃袞衣補闕繡服榮敦神州列掾會府掌屯司膳
王封迴薄飛鸞乃佐教胄載光儒門未登鼎鼐奄謝鴻鴛伊昔不造實賴能存
下光花萼上潔晨飧微君教導曷惠拯援今既絕矣哀摧忍言何以寘懷勒銘
弗諼垂諸來裔翼子謀孫

和政公主神道碑

廣德二年八月

詩美下降傳書築館貴其中禮載籍稱焉漢魏已還寂寥罕嗣以蕩陵德則維
其常皇唐勃興王道丕變平陽起娘子之軍於司竹襄城行匹庶之禮於宋公
常樂亂匡復之師於武后皆前古之所有其或生知禮樂周旋法度躬行婦道
以懋大倫克順天經光照懿烈名言之所莫究書記之所未聞聚衆美於一身
鄰太虛而獨立者其唯和政公主乎公主姓李氏隴西成紀人皇唐元宗至道

大聖大明孝皇帝之孫肅宗文明武德大聖大宣孝皇帝之第三女帝女之崇
 於斯為盛今天子之同母妹也母曰章敬皇太后后之在襁褓也石父贈太尉
 吳君曰令珪嘗遊官蜀中使道士勾規占之驚起曰此女貴不可言是生二子
 男為人君女為公主嫁於柳氏其後竟配肅宗生今上及公主神所命也厥惟
 舊哉公主三歲而孤即能孺慕育於儲妃章氏純孝過人幼而聰惠長而韶敏
 穠華秀整令德芬馨婉嫕發於天姿肅雍形於鑒寐奉今上以悌道事章如所
 生絲是特為肅宗之所賞愛至若左右圖史開示佛經金石絲竹之音績畫工
 巧之事耳目之所聞見心靈之所領略莫不一覽懸解終身不忘天寶九載春
 三月既望封和政公主降於河東柳潭既笄之三載矣潭周太保敏之五代孫
 皇蘄州刺史懷素之曾孫贈秘書監岑之第四子衣冠地胄輝映當朝初以美
 秀承家中以名聲華國道勝而貴能下善謙尊而休有烈光士林偉之解褐左
 內率府胄曹轉潁王府戶曹陳留郡司功參軍以人門第一選尚公主拜太子
 洗馬亦既好合雅相敬貴雖柳侯秉彝有度能降帝女之心而公主率履由衷

每抗古人之節故宗族胥睦不獨親其親先後大同莫敢私其子伯奴宏農楊氏太真姊務華采公主服無金翠之飾居有冰雪之容每至朔月六參朝天旅進嫣然班敘之內迥出神仙之表亦非希企之所及也梟凶羯亂常潼關不守元宗幸蜀妃后駿奔姊曰寧國公主霜嫠屏居誰或訃告乃棄其三子取其夫之乘以乘之柳侯徒行公主愧焉下而同趨者日且百里每臻坎險必先濟寧國而後從之柳侯辭公主曰我若先涉脫有危急不能俱全則棄我姊矣柳侯感歎躬負薪之役公主怡然親饋餼之事竭力供侍潭兄澄之妻楊貴妃之姊也貴倖前朝勢傾天下公主交無詔黷思未綢繆楊且云亡以孤見託馬嵬之役無噍類焉感其一言悉力營贍男登服冕之位女獲乘龍之匹出入存恤過於己子雖其密親罔或能辨柳之親昵伯仲姑姊隱覲將迎唯恐不至糾逖疏屬撫循惇嫠絲內及外終始如一孤窮滿目榮悴殊倫居薄推厚未嘗懈倦衣服飲食等無有差互或未周嬰孩罔及每至伏臘禘祠蒸嘗必具禮衣花釵之飾以躬中饋堂室之奠豈無婢使式燕孫謀姿性純儉不以迄成先聖休之寶

書清閏秋八月元宗至蜀仍舊邑而冊公主以潭爲駙馬都尉銀青光祿大夫
太僕卿屬狂將興禍稱兵向闕元宗親御闔臨視誅討駙馬率領家豎折衝
張義童等鬪於門中公主及寧國毅弓迭進駙馬乘勝突刃所向無前斬馘擒
生殆逾五十節使時宰具以表聞元宗自繫誥示先帝懇讓莫當策勳遂寢今
上之爲元帥也躬擐甲冑率先將卒舉兩京若拾遺摧凶寇如振槁勞旋方及
帑藏其空公主貿遷有無億則屢中闕羸優而數逾千萬懼不給悉昇縣官論
者難之肅宗彌留衆皆迭侍主獨瞻奉不已於旁帝有閒晝而謂之曰汝之純
孝乃能至是遂賚莊一區帝愛季女曰寶章公主因奏曰八妹未有請以賜之
泣而諫焉哀動左右西陵遷窆上戒主曰凡厥親身之物必誠必信勿之悔焉
主罄家有無以邑入千萬潛羨經費上深感歎焉上旣宅亮陰未忍臨政人之
疾苦事之得失豈嘗私謁動必以聞上敬異之朝廷賴焉廣德元年冬上旣東
幸主志期扈蹕迴兵充斥咫尺不通因至荆南尉薦諸將方隅載謚職貢以修
主有力焉上之在陝憂主匱乏乃命中使屢救節度及轉運使隨主所須務必

肅給主以國用空罄退而歎曰吾方竭家財以資戰士其能饜發首冒國經唯請名香數斤賦於佛寺爲主祈福而已王公戚屬相攜而至者藍縷膩囊襁負鱗次竭其闕斧親自瞻恤聚而泣之悲感行路初次商於頓於傳置羣盜蝟起奄譁驛亭呼而犒之曉以禍福一言革面願比家人之死靡他至今猶在緬惟罔極無所寘哀從母薛氏遺孤數四分宅居之皆俾成立萊莘兄弟盡列通班二女有行克配良士主之慈忠悉皆若是親臨稼穡躬儉節用不憚煩縟雅好組紉駙馬裳衣必親裁紵爰及子女罔衣綺紈綻新皆成主手每加訓誨蠹迪檢押廣德二載春二月歸於上都諸主高會議際夫黨覲其親族多曠周旋咸以爲時經百罹粗略可也主抗詞曰女之移天遂成他族怙貴長傲何以律人上方理定聞必不悅諸主蹶然競崇討習禮之降殺親之薄厚翕然一變職主之由夏六月才生魄屬邊候不謹烽及京師城中震驚圍視無色主旣彌月體未甚安曰事亟矣其入言之駙馬請間主曰吾業已行矣駙馬獨無兄乎因乘檐子直至寢殿乃悉索闕遺備陳利病以奏之上欣然嘉納所言未究傍或員

來因爾退歸遲明誕育展轉怙惆不能弭忘時屬炎暘熱疾有加聖情憂軫起坐失次天醫內官相繼旁午彼蒼不惠以其月二十有五日辛卯薨於常樂坊之私第春秋三十有六嗚呼皇上友愛天深痛毒兼至嗚然一叫聲淚俱咽哀動木石豈伊人倫漣漣孔懷如失於臂曰余此妹國之鴻寶方期闕云如何瘴祝降時喪天實爲之胡寧忍予乃輟朝三日命京兆尹監護喪事一以官供務從優厚柳侯招膺永悼氣索神傷心苦而忽然忘生泣盡而繼之以血况乎五男三女或齷或孩呼阿母而哭無常聲籲昊天而仁覆永絕哺以滋旨隘而莫就其爲酷痛曷愈於斯以是思哀哀可知矣自朝及野知與不知聞之失聲罔不震悼棧有青牛素服轅軛主之薨也踣地哀鳴仰天屑淚三日不銖畜猶若是臣僕可知主之將薨馭馬先殞捐館之夕見夢別墅乘之周麾偏勞愁遺俾屏不逮田客僉從數騎久已云亡衆皆驚起髣髴猶見雖所憑則厚而精氣何多主於駙馬大義敦肅不恃侃天之貴每極家人之禮駙馬雅性夷簡恬於名利願究衛生之經庶臻久視之道主志深婉順始慕真宗故於他時並受法錄

嘗謂之曰易崇積善詩貴起予不以忠孝數事迭相告勸者則心有慊焉率而行之曷嘗廢墜又以爲死生恆理先後之間若幸啓手足必當襚我以道服瘞我於支提往來行言時見存恤則所懷足矣予若不諱我若沒身未亡灑掃塋隴出入窀穸奉君周旋噫嘻於斯之時以爲謔浪豈悟今者皆符昔言有司奉詔將厚其禮駙馬疏陳皆蒙允許粵以秋八月十九日甲申敷其男試太常少卿賜紫金魚袋晟鴻臚少卿暈試祕書丞賜紫金魚袋杲試殿中丞昱臬子三女等虔窆公主於萬年縣義豐之銅人原從理命也於戲風詠歌衣史稱彤管纖微之善載籍猶稱况乎七葉帝女分形歸妹貴能上下忠以導躬備德言容貌之美服女師母儀之訓訂之繇古孰與我京昔馬遷著記謂之實錄有道見述亦云無愧某學於舊史少識前載歷考長代跂彼疑之盛未有如公主者焉雖壺則家風每挹如賓之敬而勤崇垂懿敢忘傳信之辭銘曰

穠矣公主元元之緒聖皇之孫肅宗之女今上之妹生人之矩德言容功義仁

孝忠溫良恭儉敬讓宏通率履弗越高明有融下嫁於柳猗那自久金石著明

琴瑟斯友家道以正人倫斯厚鳳凰于飛梧桐是依
嚙嚙嚙嚙福祿攸歸和樂既孺德音莫違麟之趾定振振子姓方紹母師奄摧邦令一人痛毒九有違詠詔葬於河銅人之阿支提鬱起宰樹誰過空餘好合來往滂沱

案公主封號本作和政見唐書公主列傳而何氏語林趙氏因話錄江氏筆錄皆誤作政和

唐故開府儀同三司太尉兼侍中河南副元帥都督河南淮南淮西荆南山南東道五節度行營事東都留守上柱國贈太保臨淮武穆王李公

神道碑銘

廣德二年十一月

昔宗周之中興也時則有若方叔召虎總師干肇敏之業南威蠻荆東截淮浦以左右宣王詩人歌之列在風雅我皇唐之反正也時則有若臨淮汾陽秉文武忠義之姿廓清河朔保乂王室翼戴三聖天下之人謂之李郭異代同德今古一時公諱光弼京兆萬年人也曾祖皇左威衛大將軍幽州經略軍副使府君諱令節祖鴻臚卿兼檀州刺史府君諱重英父雲麾將軍左領左羽林二軍

大將軍朔方節度副使薊郡開國公幽州都督司空諱楷洛皆以英果沈勇累
葉將邊愴威稜於幽碣公卽薊國公之第四子也體渾元之正性秉宏毅之高
躡天子純嘏生知禮度謨謀炳邃默識冲深傑出經武之才鬱爲興王之佐故
能東征北伐厭難康屯挺草昧不世之功允蒼生具瞻之望社稷威寶公之謂
歟初天后萬歲中大將軍燕國公武楷固爲國大將威震北陲有女曰韓國太
夫人才淑冠族嘗鑒之曰爾後必生公侯之子因擇薊公配焉後果生公公年
六歲嘗撫鹿而遊薊公視而誨之曰兒勿更爾公振手而起遂絕不爲童戲未
冠以將門子工於騎射能讀左氏春秋兼該太史公班固之學開元中起家左
衛左郎將歷豐下二都督府長史尋遷別駕加朝散大夫丁父憂以毀聞終喪
不入妻室太夫人高明整肅有慈有威公下氣怡聲承順而每竭其力雖已官
達小不如意猶加譙讓之責故能濟其勳業天寶二年拜寧朔郡太守四載加
左清道率安北都護仍充朔方行軍都虞候五載充王忠嗣河西節度兵馬使
加遊騎將軍守右領軍賜紫金魚袋仍充赤水軍使八月襲封薊郡開國公入

載遷右金吾衛將軍充節度副使以破吐蕃及招討吐谷渾加雲麾將軍左武衛大將軍十一載拜單于副都護十三載爲安思順朔方節度兵馬使思順慕公信義請爲婚姻公辭不獲免遂託疾罷官西平王哥舒翰聞而躓之奏歸京師遂守道屏居杜絕人事十四載冬十一月安祿山反范陽天下繹騷朝廷盱食聿求虢纘之將爰統鷹揚之師明年春正月起公爲銀青光祿大夫鴻臚卿兼雲中郡太守攝御史中丞持節充河中節度支度營田副使知節度事仍充大同軍使二月拜攝御史大夫魏郡太守充河北道採訪使俄除范陽郡大都督府長史充范陽節度使初公以朔方馬步八千人出土門其月旣望收常山郡前是太守顏杲卿臬長史袁履謙殺祿山土門使李欽湊擒其心腹高邈何千年屬太原尹王承業不出救兵杲卿履謙爲史思明所陷戰士死者踰藉於滹沱之上公親以衣袂拂去其口上沙塵因慟哭以祭之分遣恤其家屬城中莫不感激一心史思明正圍饒陽馳來拒戰公屢摧陷之詔拜公兼御史大夫俾今尙書令汾陽王郭公子儀悉朔方之衆與公合勢南收趙郡又敗之於沙

河夏六月戰於嘉山大敗之斬獲萬計思明露髮跣足奔於博陵窮蹙無計歸節於祿山祿山大恐逆徒幾潰屬潼關不守肅宗理兵於靈武盡追朔方之師加公太原尹公以麾下及景城河間之卒數千人至秋八月拜戶部尙書同中書門下平章事史思明既有河北之地與蔡希德悉衆來攻累月不尅而退公自賊逼城於東南角張帳次居止竟不省視妻子每過府門未嘗回顧是後決遣事務信宿方歸至德二載拜司徒冬十二月十五日肅宗既還京師策勳換司空兼兵部尙書封鄭國公食實封八百戶公弟光進亦以懋功同制封拜乾元元年八月拜侍中其年冬十月與九節度圍安慶緒於相州明年春三月史思明至滏陽屢絕我糧道衆咸請公簡精銳以擊之交鋒竟日思明奔北於百里之外公反旆而歸烟塵亘天諸將皆以爲賊軍大至遂南渡黃河公至則無見矣乃歸於太原是年夏五月除范陽節度使尋代汾陽王爲朔方節度使秋八月充天下兵馬大元帥以數千騎東巡追兵馬使張用濟會於汜水用濟獨來上謁公數其罪而斬之因追都知兵馬使御史大夫僕固懷恩懷恩中夜馳

赴魚貫而前再宿遄至秋毫不敢犯公趣河而東及滑州聞史思明已過河遂
迎強旅以至東京移牒留守及官吏等悉皆迴避公獨與麾下趣河陽橋城賊
先鋒已下倒懸坂公至石橋命秉燭徐行一夜方達賊望之不敢近思明來至
城下請見公公於城上謂之曰我三代無葬地一身必以死國家之患爾爲逆
虜我爲王臣義不兩全我若不死於汝手汝必死於我手將士聞之無不激勵
相持凡八月思明暴露不敢入東京乾元二年冬十月甲申賊將周贄悉河北
之衆萃於河陽城北思明以河南之衆頓於河陽南城之南南北夾攻表裏受
敵公設奇分銳襲其虛而大破贄軍臨陣擒其大將徐璜玉殺獲略盡贄僅以
身免收軍資器械不可勝數思民心悸氣索烟火不舉者三日官軍大振初公
以爲戰者危事勝負難必每臨陣嘗貯伏突於靴中義不受辱至是登城西向
拜舞因歎獻不自勝三軍見之無不淚下三年春正月遷太尉兼中書令其年
改元上元冬十一月攻拔懷州擒其僞節度安太清二年春二月統僕固懷恩
自河陽趨河清與史思明合戰於邙山屬風雨晦冥王師不利公收合餘軍屯

於垣縣遂引過請罪懇讓太尉肅宗不能違之二月拜開府儀同三司中書令兼河北尹節度使夏五月十有一日復拜太尉兼侍中充河南副元帥都知河南淮南淮西山南東荆南五道節度行營事出鎮臨淮時史朝義乘邙山之捷圍逼申安等一十三州自領精騎圍李岑於宋州公之將吏皆兇懼議南保揚州公謂之曰臨淮城池卑陋不堪鎮遏不如徑赴彭城俟其東寇躡而追之賊可擒也遂趨徐州因召田神功宴慰與同寢宿以宋州之難告祖道郊外俾先飲以寵之分麾下隸於其將喬岫仍令兵馬使郝庭玉與岫犄角而擊之賊遂一戰而走使來告捷公已屈指俟報俄而言語至焉今上登極寶應元年夏五月進封臨淮郡王廣德元年秋七月加實封三百戶通前後凡二千戶賜鐵券名藏太廟仍圖畫於凌烟閣冬十一月上在陝州以公兼東都留守制書未下久待命於徐州將赴東都屬疾痢增劇公知不起使使齎表奉辭廣德二年秋七月五日己亥薨於徐州之官舍初將吏等問以後事公曰吾久在軍中不得就養今爲不孝子矣夫復何言因取已封布絹各三千匹錢三千貫鬻麥以分

遺將士衆皆感痛不自勝及公云亡遂以其布爲公製服庚申哀問至上都上
痛悼之輟朝三日太夫人一慟而絕終夕方蘇使開府魚朝恩就宅敦諭京兆
尹第五琦監護喪事九月己未追贈太保十二月闕二太常議行諡曰武穆夫
人薛國夫人太原王氏泉長子太僕卿義忠並先公而逝次曰太府少卿太僕
卿象殿中丞彙等皆保家克荷備聞詩禮無忝燕翼過庭之訓冬十一月二十
七日庚申泣而咨於王母虔窆公於富平縣先塋之東禮也於戲公以吉甫文
武之姿兼樊仲將明之德王國多難羣胡構紛藉朔方偏師之旅入井陘不測
之地思明鏗銳於恆定祿山絕望於江淮守太原而地道設奇保河陽而雲梯
罔冀破周贄於溫沈擒太清於覃懷走史朝義叛渙之衆於梁宋救僕固瑒已
危之軍於瀛莫皆意出事外虜墜計中天下有磐石之安國家無贄疣之患此
皆公之力也公兄遵直遵行仕至將軍衆弟光炎並不幸早世次曰光顏特進
鴻臚卿皆以將略見稱時輩季曰光進開府儀同三司太子太保兼御史大夫
渭北節度使涼國公清識表微沈謀絕衆剛亦不吐柔而能立與公並時仗鉞

分閫

闕二字

凌霄翼聖既有戴天之功華原統師獨聞禁暴之德方當會同正至榮曜君親入侍黼帷峨二貂乎泰階之上歸聯綵服頓雙節於高堂之下斯歡未劇遺恨何居昔斛律丞相與弟并州同務烈於北齊賀拔行臺與兄雍州亦宣力於西魏咸稱義烈各懋勳庸而風樹寂寥偏隅隘陋比之我族事則不侔真卿昔守平原困於兇羯繫公莅止獲保餘生束帶與居空想北平之禮操觚論撰敢墜中郎之辭銘曰

羯胡猖狂俶擾皇綱降生臨淮佐我興王惟此臨淮萬夫之望爰初發迹罔我弗臧出入忠孝人倫激昂其心鐵石其行珪璋天寶末造河朔恇攘天子命公經營朔方沙河嘉山我伐用張思明歸節祿山震惶潼關勿帥醜虜其亡肅宗有命大鹵於襄應變如神兇徒靡亢介珪入覲台座用光俾公東征北國是皇長圍鄴下望入河陽擒斬渠魁霆擊龍驤淮瀆鎮定徐土翱翔服田蠖屈料場鷹揚不有神算疇戡暴強弟兄同時秉鉞煌煌方期凱旋雙映旗常晨趨法座夕慶高堂如何不辰愆此百祥素輒反葬白驥跼箱簫鼓悲鳴羽儀分行萬乘

